

Jém toto jém ijayñewiip jém Xiwan iga tanquejáypa tí miñpa

Jém Jesucristo icjodóna
jém Xiwan tí miñpa

1 Yiimpic icwiñquej Dios jém Jesucristo iga je inquejáyiñ jém icuyoxayajpaap tí miñpa dá jáyñe. Jesucristo icutsat tum jém siñyucmipic pixiñ iga icjodónaiñ jém Xiwan jém icuyoxapaap jém Jesucristo. ²Ich aXiwan, annuumañmatpa jém Dios inmañi y jém anímayñewiip Jesucristo con itumpiy jém ánixwiip. ³Tsam maymay jém imaypaap y jém imatoñyajpaap yíp añañi títam miñpa. Maymáayajpaatim jém icupicyajpaap juuts jayñeta porque dá jáyñe núcpa jém inañpigam jama.

Jém Xiwan ijáyáy jém siete grupo

⁴Ich aXiwan, siip manjáyáypa mimichám jém miñtuumatampaap jém siete grupo jém miñtanwiip jém naxyucmi de Asia. Miwiwadaytámiñ Dios, michiifámiñ jém paz inañamañjom iga odoy tí inçinjtámiñ. Dá nunca cuyajpa jém tanJatuñ Dios, if dende wiñigam, íftim siip, if para siempre. Miwiwadaytámpatim

jém siete espíritu jém ityajwiip jém Dios itrono iwiñjom.

⁵Miwiwadaytámpatim jém tánQmi Jesucristo jém wibic testigo jém dápic migóypa. Je jém wiñtipic acpisnetá de juñ if jém caaneyajwiip. Más mijpic añjagooyi, injacpa itumpiy jém reyyaj de yíp naxyucmi. Tsam tatoypa. Taccáyáypa jém tantañca porque ifegáy jém inñipiñ. ⁶Jém Cristo taccámta juuts tanjagooyi, juuts tapanij iga tançuyoxatámiñ tanJatuñ Dios jém Cristo iDios y iJatuñ. Wi iga tançujíptámiñ porque je iniit itumpiy ipimi para siempre, dá nunca cuyajpa. Amén.

⁷Ixtaami. Miñgacpa yíp naxyucmi jém tánQmi Cristo jém ucsañjom. Itumpiy jém pixiñtam icuwiñi yíp naxyucmi iixyajpa cuando miñpa. Iixyajpaatim jém Israelpic pixiñtam jém ichenwiip. Tsam weyjajpa itumpiy jém pixiñtam cuando iixyajpa jém Cristo. Jempigam inñascayajpa.

⁸Nimpa jém tánQmi Cristo jém iniitwiip itumpiy ipimi: “Ich jém awiñtipic y jém inañpic juuts jém letras alfa y omega.” Ich aif dende wiñigam, aiftim siip, aifpa para siempre.

Jém Xiwan iix Cristo juuts tùm poñ

⁹Mantjwítam, ich aXiwan, manacjodónap iga ich annascanefím jém yaachaji juuts mimichfám jém tánOmi Cristo icuyucmi. Je tsam tayoxpátpa iga tanyaachýpa iganam tanañjóctámpa jém jama iga nicpa tawagaíti juť injacpa jém tánOmi Cristo. Apajta jém isla inñyi Patmos porque anañmatpa jém Dios inmaťi y anañmatpa iga jém Jesucristo tawiwadáypa. ¹⁰Ich aít en el Espíritu cuando núc jém tánOmi ijama. Jesic ammaton antuuniançim tùm mijpic jyi juuts tùm trompeta inñyi. ¹¹Nimpa jém jyi:

—Ich jém awiñtipic y jém inañpic juuts jém letras alfa y omega. Títam inixpa siip jaycaami tùm librojom. Cutsadaayi jém siete grupo juť añtuumayajpa jém Dios ipixiñtam jém naxyucmi de Asia. Cutsadaayi jém ityajwiip jém atebet Efeso, Esmirna, Pérgamo, Tiatira, Sardis, Filadelfia y Laodicea.

¹²Jesic aámset antuuniançim iga ánixiñ i ajýáy. Cuando aámset, ánix siete jém nooquejucy tuncuy de oro. ¹³Juť it jém siete nooquejucy tuncuy de oro, jenum icucmi teñ tùm pixiñ, íamooyi juuts jém Miñnewiip Siñyucmi. Iccámne tùm yagats yooťi núcne hasta ipuyucmi. Iccámnetim ipechoyucmi juuts tùm wiťipic cinturón de oro. ¹⁴Jém iway jém ítwiip icobacyucmi tsam popo juuts lana. Pimi popo juuts nieve. Agui tsoopa jém iixcuy juuts tùm jucti aguiptic yótpa. ¹⁵Jém ipuy agui tsoopa juuts wibic bronce.

Tsoopa juuts tñcuy pijneta juctjom. Tsam pimi jýpa juuts tñpa jém ni cuando comne. ¹⁶Imatspacne siete matsa inwiciimi. Jém ijipjom putpa tùm espada agui tsupa icudoslado. Jém íamooyi pimi tsoopa juuts jém jama cuando agui pimi pijpa.

¹⁷Cuando ánix, acutiñ ipuyciim juuts acaane. Jesic atsic con inwici. Anímáy:

—Odoy cñi. Ich jém awiñtipic y jém inañpic. ¹⁸Ich jém avivopic. Accaata, pero siip aít vivo para siempre. Ich anaít jém llave para jém lugar juť pajyajtap jém caaneyajwiip. ¹⁹Jaycaami títam inixñe, títam inixpa siip y jém miñpáppic ocmim. ²⁰Siip manañquejáypa jém jixi jém añnécnewiip, ti nimtooba jém siete matsa jém ammatpacnewiip anañwiciimi y jém siete nooquejucy tuncuy de oro. Jém siete matsa nimtooba jém siete añmáciwiñ jém inmatyajpáppic jém Dios inmaťi para jém siete grupo de jém Dios ipixiñtam juť añtuumayajpa. Y jém nooquejucy tuncuy de oro nimtooba jém siete mástic juť añtuumap jém Dios ipixiñtam.

Cutsadayta añmaťi jém ityajwiip jém atebet Efeso

2 Jáyayí jém pixiñ jém inmatpáppic jém Dios inmaťi juť añtuumayajpa jém Dios ipixiñtam jém atebet Efeso. Nímaayi: “Yiimpic nimpa jém iniítwiip jém siete matsa icijom, jém siipáppic juť tunnetá jém nooquejucy: ²Ich anjodon iga mimichfám tsam inwíwattámpa y mánixpicpa iga tsam pimi

miyoxatámpa y iga iñyaachiytámpa jém mijpic yaachaji. Anjodonjim iga da injwinanigaytámpa jém malopic pixiñtam. Anjodonjim iga injcutitstámpa jém pixiñtam jém nímanjtaayapáppic iga Dios icutsatne. Tsam wiquejpa iga migoypaap. ³Tsam iñyaachiytámpa cuando miyaachwattamtap y cuando mimalwadaytámtap ich aņcuyucmi. Da inĥacneta iga antúnjyfa. ⁴Pero anaiĥ algo en contra de mimichtam. Porque dam jespuy antoypa juuts wiñti cuando moj aņcupicta. ⁵Jeeyucmi jistaami jutsap antoyta wiñti cuando danam micutiņneta. Cucactaami jém inĥixi. Eybic wattaami juuts moj injwatta wiñti. Siiga da injcuctámpa jém inĥixi, ich da jáyñe aniĥpa jemĥic, manaccáyaypa jém inĥooquejcu tuncuy y da más tsoĥpa jém wibic jucti juĥ miĥta. ⁶Pero tum wibic cosa injwatta. Inĥójixtámpa ti iwatyajpa jém icupicneyajwiip jém nicolaĥtaspic injquímayooyi. Ich anĥójixpatim jém aņquímayooyi. ⁷Siiga miĥatsigiyta, matonjtaami ti nimpá jém Dios iAnama juĥ aņtuumayajpa jém Dios ipixiñtam. Nimpá así: Siiga injcoñwýpa jém enemigo, jesic manĥiiba jém wibic cuy ítim iga injcútpa jém michiipáppic vida. Íf jém cuy juĥ tsam wicom juĥ íf Dios.”

**Cutsadayta aņmaĥi jém ityajwiip
jém attebet Esmirna**

⁸Jáyaayitim jém pixiñ jém injmatpáppic jém Dios injmaĥi juĥ aņtuumayajpa jém Dios ipixiñtam jém attebet Esmirna. Nímaayi: “Yiimpic nimpá jém wiñtipic

y jém inĥapic, jém caanewiip idic, pero siip vivojam: ⁹Ich anjodon ti síp injwatta. Anjodon iga tsam miyaachwattamtap y tsam miyaachap, pero iniĥta tunjgac riqueza. Anjodonjim iga tsam mimalmalnímáypa jém pixiñtam jém ijisyajpáppic iga nuntá Israelpic pixiñtam, pero da je. Jeeyaj jém Wocĥiwiñ imiĥi. ¹⁰Odoj cįņtaami iga tsam miyaachwattamtap. Jém Wocĥiwiñ micottámpa cárcel algunos de mimichtam iga micutiĥstamtap. Tsam pimi miyaachwattamtap diez día. Pero yaachiytaami hasta micaaba, jesic ocmi manĥiiba jém vida jém dápic cuyajpa juuts tum coñwýooyi. ¹¹Siiga miĥatsigiyta, matonjtaami ti nimpá jém Dios iAnama juĥ aņtuumayajpa jém Dios ipixiñtam. Nimpá yiimpic: Siiga injcoñwýpa jém enemigo da wisĥiy micaaba. Yíp nimtooba iga da miñĥpa juĥ chiiyajtap castigo para siempre.”

**Cutsadayta aņmaĥi jém ityajwiip
jém attebet Pérgamo**

¹²Jáyaayitim jém injmatpáppic jém Dios injmaĥi juĥ aņtuumayajpa jém Dios ipixiñtam jém attebet Pérgamo. Nímaayi: “Yiimpic nimpá jém iniitwiip jém espada jém aguipic tsupa icudoslado. ¹³Nimpá iga ich anjodon ti injwattámpa. Anjodonjim iga miĥta jém lugar juĥ injjaca jém Wocĥiwiñ. Da inĥactámpa iga aņcupicpa ni da iniņnéĥpa iga aņcupicneta ni jém jama cuando accaata jém injcompañero Antipas. Jém pixiñ tsam inĥuumaņmatpa ich anaņmaĥi.

Accaata juŕ miifŕa mimichŕam jém attebet juŕ íf jém Wocciwiñ. ¹⁴Pero anaif algo en contra de mimichŕam. Inŕwaganaiŕŕa jém attebet Pérgamo algunos jém malopic pixiñŕam jém đapic ichactooba jém Balaam inŕquímayooyi. Wiñigam jém Balaam inŕquejáy jém Balac jutsap icmalwat jém Israelpic pixiñŕam. Inŕquejáy iga wi iga iciisayjpa jém mayi jém accaanetawiip jém watnas iwiñjom. Inŕquejáyŕim iga wiap imalwatyaj con jém malopic yomtam. ¹⁵Inŕwaganaiŕŕatim algunos jém pixiñŕam jém đapic ichactooba jém nicolaítaspic inŕquímayooyi. Ich anjójixpaŕim jém anŕquímayooyi. ¹⁶Jeeyucmi mannímáypa: Tsactaami iga immalwattámpa. Siiga đa inŕhactámpa iga immalwatpa jesic đa jáyñe anicpa juŕ miifŕa. Nicpa áñaji contra jém malopic pixiñŕam con jém espada jém anaifwiip anjipjom. ¹⁷Siiga miŕatsigiyŕa, matonŕtaami ŕi nimpa jém Dios iAnama juŕ anŕtuumayajpa jém Dios ipixiñŕam. Nimpa yiimpic: Siiga inŕcoñwíypa jém enemigo, manchiiba jém wiñicpic wícuy, jém maná, jém nécnewiip. Manchiiba tum tsa aguipic popo. Jaycámayñeta jém tsaayucmi tum jomipic niyi. Đa i ijodon i inŕiyi jaycámayñeta jém tsaayucmi solamente ijodon jém ipictsonŕpáppic.”

**Cutsadayŕa anŕmaŕi jém
íŕyajwiip jém attebet Tiatira**

¹⁸Jáyaayíŕim jém pixiñ jém inŕmatpáppic jém Dios inŕmaŕi juŕ anŕtuumayajpa jém Dios ipixiñŕam

jém attebet Tiatira. Nímaayi:
“Nimpa así jém Dios iManic jém aguipic tsoepa iixcuy juuts yótpa tum jucti, jém aguipic tsoepa ipuy juuts jém wibic bronce: ¹⁹Ich anjodon inŕumpiy ŕíŕam inŕwattámpa, iga tsam miŕóyoyŕámpa, iga tsam inŕcupictámpa Dios, iga tsam inŕcuyoxatámpa jém inŕiŕiwitam, iga tsam inŕyaachiyŕámpa cuando miyaachwattamŕa. Siip más inŕwiwatpa que cuando moj inŕcupicta. ²⁰Pero anaif algo en contra de mimichŕam porque inŕjictámpa iga jém malopic yomo, Jezabel, inŕquejpa jém malopic inŕquímayooyi. Nímanŕtaayap iga inŕmatpa jém Dios inŕmaŕi. Tsam imigóyáypa jém ampixiñŕam jém acuyoxapáppic. Nimpa wi iga pejóypa y wi iga iciispa jém mayi jém accaanetawiip jém watnas iwiñjom. ²¹Anchi lugar jém yomo iga ichaguiñ jém malopic jixi, pero đa icuctooba jém ijixi. Đa ichactooba iga pejóypa. ²²Siiga siip đa ichacpa iga iwatpa mal, jesic anacmatspa tum mimnei tsam piimi jém yomo. Y jém malopic pixiñŕam, jém pejoyyajpáppic con jém yomo, anyaachwatpa con tum castigo siiga đa ichacpa iga íŕuñyŕpa jém miŕgooyi. ²³Anaccaaba jém ipixiñŕam jém icupicneyajwiip jém miŕgooyi. Jesic inŕumpiy jém Dios ipixiñŕam ijodonŕayajpa iga ich anjodon ŕi iniif inŕanamajjom jém pixiñŕam y ŕi iniif jém ijixianjom. Cada tumtum de mimichŕam manyojpa juuts inŕwatneta. ²⁴Pero los de más de mimichŕam miifŕanjwiip jém attebet Tiatira, đa impictsonŕa yíŕ malopic

añquímayooyi ni dá inçuyujcata jém Wocciwiñ imigooyi. Siip dá manchiiba tunçac añquímayooyi. ²⁵Solamente wattaami seguido juuts manañquejayñe hasta amiñpa juí miífta. ²⁶Siiga inçoñwíypa jém enemigo y dá inçacpa iga inçwatpa juuts ich añwianjam hasta que miñpa jém inañpigam jama, jesic manchiiba jém pimi iga ininçactampa yíp naxyucmipic pixiñtam. ²⁷Ininçactampa con tum tñçuy vara con jeetim pimi juuts achiñe jém anJatuñ Dios. Y yíp naxyucmipic naciónyaj cuyajpa ipimi juuts cusamáypa tum nas suuj. ²⁸Jesic manchiibañtam jém wítmatsa jém químpaap jém cuquejaciim. ²⁹Siiga mitatsigiyta, matonçtaami tí nimpá jém Dios iAnama juí añtuumayajpa jém Dios ipixiñtam.”

Cutsadayta añmañi jém ifyajwiip jém attebet Sardis

3 'Jáyaayitim jém pìxiñ jém inçmatpáppic jém Dios inçmañi juí añtuumayajpa jém Dios ipixiñtam jém attebet Sardis: Nímaayi: “Nimpá así jém iniitwiip jém siete espíritu de Dios jém imatspacnewiip jém siete matsa inçwiciimi: Ich anjodon inçumpiy títam inçwattampa. Nimyajpa iga mivivo, pero micaane. ²Nawattaji cuenta, odoy monçtaami. Más pìmchijí jém wibic jixi jém uxançic tsíyñe porque cuyajtooba jém wibic jixi juuts caatooba. Ánix iga dá capsá inçwíwatta jém tanJatuñ Dios iwiñjom. ³Jístaami jém añquímayooyi jém imipctsonnewiip. Odoy tsaci iga

inçupicpa. Tsaci iga immalwatpa. Siiga dá miífta al tanto, jesic amiñpa juuts tum númpaap tsuucim. Mañcupiichçíypa. Dá inçodon juchix hora miñpa manchi jém castigo. ⁴Pero íftim con mimichñtam jém attebet Sardis algunos jém pixiñtam jém ñapic imalwatne, jém ñapic ítuudiyñe ipuctucu. Jeeyaj wíap añwaganawíyay wíaccuyajnetá con jém popopic puctucu. Wíap icám jém popopic puctucu porque dá imalwatne. ⁵Siiga i inçoñwíypa jém enemigo, accámaytap tum popyooñi y dá nunca anactogóyáypa inñiyi jém librojom juí jaycámnetá jém pixiñtam inñiyi jém anchiipáppic jém vida jém ñapic cuyajpa. Núcpa jama iga ampictsonçpa jém anJatuñ Dios iwiñjom juí íf jém inçuyucmipic pixiñtam. Ich anañmadáypa iga jém pìxiñ ich ammiichi. ⁶Siiga mitatsigiyta matonçtaami tí nimpá jém Dios iAnama juí añtuumayajpa jém Dios ipixiñtam.”

Cutsadayta añmañi jém ifyajwiip jém attebet Filadelfia

⁷Jáyaayitim jém pìxiñ jém inçmatpáppic jém Dios inçmañi juí añtuumayajpa jém Dios ipixiñtam jém attebet Filadelfia. Nímaayi: “Nimpá yíimpic jém Cristo jém ñapic tñçaciy, jém inçmatpáppic jém numpic añmañi. Je iniit jém llave de jém rey David. Jém Cristo una vez inçáyñeum jém puerta dá i wíap inçnúc. Cuando inçnúcneum jém puerta dá i wíap inçáy. ⁸Ich anjodon títam inçwatneta. Siip, antsacne tum puerta inçwiñjom, añáyñe. Dá i wíap inçpaj. Mañwadáy así porque aunçue

uxaŋ impimi, agui inwadaytampa caso iga incupictampa ich anaŋmafi. Da ininectampa ich anniyi. ⁹Siip ich anciijuncotpa jem intuumawatnewiip jem Wocciwiin, jem nimaŋpaap iga nunta judios pero da je, migopya. Siip ich anwatpa iga miŋyajiŋ y costenyajiŋ impuyciim iga iixyajpa iga agui mantoypa. ¹⁰Mimichfam tsam inwatne juuts mannimayne. Inyaachiyta jem yaachaji. Jeeyucmi maŋcupujpa iga odoy inŋascatamiŋ jem miŋpic yaachaji cuando nucpa jem jama iga tsam cutitstap itumpiy jem pixiŋtam jem ityajwiip yip naxyucmi. ¹¹Da jayne amiŋgacpa. Odoy tsaci jem wibic anmafi jem iniiŋwiip iga odoy i wiain miccayay jem incoñwiyooyi. ¹²Jem icoñwiypaap jem enemigo, anaccampa juuts jem Dios imastic icom iga icoppacpa jem imastic. Jemum nicpa ifi para siempre. Da nunca putpa. Anjaycamaypa jem anJatun Dios iniyi jem pixiŋ iwiŋpacyucmi. Anjaycamaypatim jem jomipic Jerusalen iniyi jem miŋpappic siyucmi. Jem anJatun Dios imiichi jem icutsatpaap yip naxyucmi. Ocmi anjaycamaypatim jem pixiŋ iwiŋpacyucmi jem jomipic anniyi. ¹³Siiga miŋatsigiyta, matonŋtaami ti nimpa jem Dios iAnama jut antuumayajpa jem Dios ipixiŋtam.”

**Cutsadayta anmafi jem ityajwiip
jem attebet Laodicea**

¹⁴Jayaayitim jem pixiŋ jem inmatpappic jem Dios inmafi jut antuumayajpa jem Dios ipixiŋtam jem attebet Laodicea. Niŋmaayi:

“Nimpa asi jem dapic migopya, jem wibic testigo jem nuumanmatpaap, jem cobapic, jem moŋwiip iwat itumpiy cosa. ¹⁵Ich anjodonŋ itumpiy fitam inwattampa. Anjodonŋim iga da mipagac ni da mipijpa. Yip nimtooba iga da pimi anjoxpa ni da pimi antoypa. Mas wi meega anjoxpa o antoypa. ¹⁶Pero como mijocox no mas y da mipagac ni da mipijpa, jesic mantsujputpa juuts tum cosa dapic wi. ¹⁷Mimichfam miŋimtampa iga tsam mirico, tsam iniit jem inyoxaji y da ti mitogoyay. Pero da injodonŋtam iga tsam miyaachap, tsam miuuguytim. Tsam mipobre, micachti, incusici. ¹⁸Jeeyucmi ich mananquimpa: Juytaami jem wibic oro jem ichpic anaif jem witsacnewiip jem juctjom iga iniiŋtamiŋ jem wibic riqueza. Juytaamitim jem popopic yooti jem ichpic anaif iga incusuypa jem immijtay porque incusici iga odoy michaŋiŋ. Coti inixcom jem ixcuy ichoy iga miixixoyiŋ. ¹⁹Jem antoypappic anwogaypa siiga imalwatpa. Anchiiba castigo iga ichaguin iga imalwatpa. Wiwattaami con itumpiy inanama. ²⁰Ixi, ich yim aten tum puerta anŋaca. Sip antics jem puerta. Anjayaypa jem tic iomi. Siiga amatonaypa jem anjiyi y inaypa jem puerta, jesic ich atigiyta jem pixiŋ iticjom. Anwaganawicpa jem pixiŋ.

²¹Itumpiy jem icoñwiyyajwiip jem enemigo anchiiba tum lugar iga anwaganacoŋpa jem anjagooyi icoñcuyucmi. Jexitim juuts aich cuando ancoñwiy jem anenemigo, nic anwaganacoŋ jem anJatun Dios

icoñcuyucmi, jém itrono. ²²Siiga mífatsigiyfa, matonŕtaami tí nímpa jém Dios iAnama juŕ aŕtuumayajpa jém Dios ipixiñtam.”

Jém ifyajwiip siñyucmi ijisyajpa Dios

4 Jesic ocmi aámquím, ánix tùm puerta ányáñe siñyucmi. Eybic ammatoŕ jém jiyi jex juuts jém trompeta inŕjyi. Ajíyáy.

Anímáy:

—Quiimi yim. Manañquejáypa tí miñpa ocmim.

²Jesic jeetí rato tsam anaif jém Dios iAnama. Ánix iga tunne tùm añjagooyi icoñcuy siñyucmi. Coññim jém icoñcuyucmi.

³Jém coñwiip jém añjagooyi icoñcuyucmi jém iámooyi jex juuts tùm jém wibic tsa jém aguipic tsoepa jém jaspe y de cornalina. Juŕ if jém coñcuy icuwoyxetne tùm júñchi agui tsus juuts tùm esmeralda. ⁴Ánixim tuŕgac veinticuatro jém añjagooyi icoñcuy icuwoyxetne jém mijpic coñcuy. Jemum coñyay veinticuatro wiđaytam. Agui popo ipuctucu. Cada tũmtũm iccámneyaj tũm corona de oro icobacyucmi. ⁵Jém añjagooyi icoñcuyucim putpa majiywiñ. Agui tũñpa, agui nácsóypa. Jém coñcuy iwiñjom yótpa siete jucti de jém siete espíritu jém Diospic imiichi. ⁶Jém añjagooyi icoñcuy iwiñjom if tũm lamar taŕcuámnaspa juuts tũm vidrio juuts tũm cristalino.

If cuatro vivopic cosa icuwoyxetneyaj jém coñcuy. Icutero naps ixcuy iwiñjom y ifuñiañcim. ⁷Tũm jém vivopic cosa juuts tũm cañ. Jém tuŕgac juuts tũm mañtoro.

Jém tuŕgac iwiñpac juuts tũm pxiñ. Jém tuŕgac juuts tũm tajpi quecpa ixí. ⁸Icucuatro jém vivopic cosa cada tũmtũm iniif seis ixaj. Jém ixajyucmi y jém ixajcucim naps ixcuyim. Siñi y tsucim da jejyajpa. Seguido nimyajpa:

Tsam miwi, tsam miwi, tsam miwi, mánOmi Dios, mich iniif itumpiy impimi. Miif dende wiñgam, miiftim siip, miif para siempre.

⁹Jém vivopic cosa icujippa y ichiiba gracia jém coñwiip jém añjagooyi icoñcuyucmi jém dapic nunca cuyajpa. Cada vez iwatpa así ¹⁰jesic jém veinticuatro wiđaytam icosteñayaj jém Dios iwiñjom juŕ coñ jém coñcuyucmi. Ijisyajpa tanJatuŕ Dios jém dapic nunca cuyajpa ivida. Jesic jeeyaj ipatsquedáy jém corona jém añjagooyi icoñcuy iwiñjom. Nimyajpa:

¹¹MánOmi Dios, wi iga mañcujiptampa. Mañcujippa iga tsam miwiap y tsam iniif impimi. Mich inwat itumpiy cosa. Ifyay itumpiy cosa porque mich inwianjam. Jeeyucmi inwatne.

Jém libro y jém Cordero

5 Jesic ánix iga jém coñwiip jém coñcuyucmi imatspacne tũm libro inwiciimi. Jém libro juuts tũm yagatspic toto wotneta. Jayñetim añsici y jayñetim jojmi. Jém toto añtsajne con siete sello. ²Jesic ánix tũm siñyucmipic pxiñ tsam iniif ipimi. Agui jiyja. Nímpa:

—¿I inií jém autoridad iga ínýapa jém libro iga ijacpa jém sello?

³Pero *da i jém wiapaap* íný. Ni jém *siñyucmipic*, ni jém *naxyucmipic*, ni jém más *nasciimpic da i wiap íný jém libro ni da i wiap íám*. ⁴Jesic *tsam pimi awej* porque *da quej ni tum pixiñ jém wiapaap íný jém libro iga imaypa*. Ni *da i wiap íám*. ⁵Jesic *tum de jém wiđaytam anímáy*:

—Odoy *weji*. *Mannímáypa iga jém León jém tsucumnewiip de jém tribu de Judá, jém rey David iocmanic, icoñwáy ítumpiy jém ienemigoyaj*. Je *wiap íný jém libro*. *Wiap ijac jém siete sellos*.

⁶Ánix jém *Cordero noco teñ jém anjagooyi icoñcuyañnaca juí ít jém cuatro vivopic cosa, jém veinticuatro wiđaytam iwiñjom*. *Quejpa iga accaaneta idic jém Cordero, pero siip pisneum*. Inií siete *iwañ y siete iixcuy*. *Yíp nimtooba jém siete espíritu jém icutsatnewiip Dios icuwíti yíp naxyucmi*. ⁷Jém *Cordero miñ ipic jém libro juí imatspacne iñwíciimi jém coñwiip jém anjagooyi icoñcuyucmi*. ⁸Cuando *ipic jém libro, jesic jém cuatro vivopic cosa y jém veinticuatro wiđaytam icosteñáypa jém Cordero iwiñjom*. Cada *tumtum de jém wiđaytam inií tum arpa y tum xanu de oro*. *Comne jém xanu con jém wibic poma*. *Jém poma nimtooba jém oraciones jém iwatnewiip jém Dios ipixiñtam*.

⁹Jesic *iwanyajpa tum jomipic wañi*. *Nimyajpa*:

Mich wiap impic jém libro.
Wiap iñjac jém siete sellos.
Porque miccaata iga anyojayta antánca.

Iñtegáy iññiipiñ iga iñjúyayñe para Dios
pixiñtam de ítumpiy raza,
jém inmatyajpáppic tungac añañi,
jém ítayjwiip tungac naxyucmi y de jém tungac naciónyaj.

¹⁰Dios *accámta iga anjagooyi y apanijtam*
iga añcuyoxatámpa Dios
iga ananjactámpa jém ítayjwiip yíp naxyucmi.

¹¹Ocmi *ánix iga añtuumaneyaj tsam jáyañ jém siñyucmipic pixiñtam*. *Ammatónáy ijíyi*. *Icuteñxetneyaj jém anjagooyi icoñcuy juí ít jém cuatro vivopic cosa y jém wiđaytam*. *Ítyaj millones y millones de jém siñyucmipic pixiñtam*. ¹²*Tsam pimi jíyyajpa*. *Nimyajpa*:

Tañcujíptámpa jém Cordero jém accaaneta wiip idic
porque tsam wiap.
Wi i iga ipictsoñ ítumpiy ipimi y jém riqueza y jém wibic jixi.
Wi i iga jém pixiñtam icujípyajiñ y ichiiyajiñ gloria.

¹³*Ammatoñtim iga jíyyajpa ítumpiy jém Dios iwañi, jém ítayjwiip siñyucmi, jém ítayjwiip naxyucmi, jém ítayjwiip nasciim, jém ítayjwiip jém lamar y ítumpiy cosa juñinquej*. *Nimyajpa*:

Wi i iga tañwíwadaytámiñ jém coñwiip jém anjagooyi icoñcuyucmi
y jém Cordero para ítumpiy tiempo.

Tañcujíptámpa,
tanchiitámpa gloria,
añwíañjamta iga anjactámpa.

¹⁴Jesic *jém cuatro vivopic cosa nimyajpa*:

—Amén. Ítım wı.

Jém veinticuatro wıdayfam costeeñactıyay. Moj ijısyaj Dios, jém ďapıc nunca cuyajpa ivida.

Jagayfa jém libro iğnúccuy

6 Jesic ánix cuando jém Cordero ijac jém wiñtipıc sello jém libroyucmı. Ammaton ıga jıy tım jém vivopıc cosa. Agui tıñpa jém ijıy juuts majıywiñ. Anı́máy:

—ıMıñı, aamı!

²Jesic ánám. Ánix tım popcawaj. Jém iquımcanewııp jém popcawaj imatspacne tım picxi icijjom. İccámne icobacyucmı tım corona. Nicpa iconwıy jém ienemigo.

³Cuando jém Cordero ijac tungac jém sello jém libroyucmı, jesic ammaton ıga jıy jém tungac vivopıc cosa. Anı́máy:

—ıMıñı, aamı!

⁴Jesic put tungac cawaj, tsabatspic. Jém iquımcanewııp chiıfa tım mijpic espada. Chiıfatım jém pımi ıga ıcsucumpa jém guerra ıga tsam ájayajpa jém pixiñtam ıga naccaayajtap.

⁵Cuando jém Cordero ijac tungac jém libro ixello jém trespic, ammaton ıga jıypa jém tungac vivopıc cosa. Anı́máy:

—ıMıñı, aamı!

Jesic ánám. Ánix tım yic cawaj. Jém iquımcanewııp inisiıba tım balanza icijjom. ⁶Jesic ammaton tım jıy juı itıy jém cuatro vivopıc cosa. Nimpa:

—Mıma jama yoxayajpa ıga iconwıyfa tım kilo de trigo o tres kilo de cebada. Odoy accaı jém olivos icuy jém pictapaap para aceite ni jém uvas icuy.

⁷Jesic cuando jém Cordero ijac tungac jém libro ixello jém cuatropic, ammaton ıga jıypa tungac jém vivopıc cosa. Anı́máypa: —ıMıñı, aamı!

⁸Jesic ánám. Ánix tım cawaj da wı icolor agui cupuchayñe. Jém iquımcanewııp iñıyı jém accaoypaap. Ítúyıpa jém Hades, yıp nımtooba jém lugar juı it jém caaneyajwııp. Chiıyajta jém pımi ıga iccaayajiñ tım cuarta parte yıp naxyucmıpic pixiñtam con jém espada, con jém yuu, con jém malopıc caacuy y con jém jimñı animatyaj jém itıyajwııp yıp naxyucmı.

⁹Jesic cuando jém Cordero ijac tungac jém libro ixello jém cincopic, ánix jém altarcucım jém pixiñtam ıanamayaj jém accaneyajtawııp jém Dios iğmıti icuyucmı porque da iğnéc ıga icupıcyajpa tánOmi Cristo. ¹⁰Jém anamayaj tsam pımi jıyayajpa. Nımyajpa:

—MánOmi Dios, tsam miwı. Mich miñımapıc. ¿Hasta jusan ıncııpııpa jém malopıc pixiñtam jém itıyajwııp vivo jém naxyucmı ıga antségáypa jém ançobac?

¹¹Jesic cada tımtım jém anama chiıfa tım yagats yooıti tsam popo. Nımayyajta ıga poyjeıyajiñ tım rato hasta que capsıa jém numero de jém itıwitam jém accaıyajtapııpic juuts jeeyaj, jém icuyoxayajpııpicım jém Cristo.

¹²Jesic cuando jém Cordero ijac jém tungac jém libro ixello jém seispıc, ánix ıga miñ tım nasyııxi tsam pımi. Cıpiıcha jém jama juuts tım pıctııcu tsam yıc. Jém poya set juuts niıpiñ agui tsabats.

¹³Jém matsa jém ítwiip siñyucmi actiñ naxyucmi juuts cuando tum mijpic sawa icyojpa jém tsuj ífím cuando mañiñam. ¹⁴Jém siñ togoypa juuts tum toto cuando tañwotpa. Ítumpiy jém cotsic y jém isla accáyfa ilugar juí idíc íf. ¹⁵Jesic ítumpiy jém añjagooyiyaj y jém iniítyajwiip ipimi yíp naxyucmi y jém soldado injagooyi y jém ricoyaj y jém iniítwiip ipimi con ítumpiy jém esclavo y jém dápic je esclavo, ítumpiy tsam cñyajpa, wagayamyajpa jém tsaajosjom y jém tsaanjom jém cotsiganjoj.

¹⁶Inímayyajpa jém cotsic y jém tsa: —Acuchijquettaami, acyami iga odoy aixiñ jém coñwiip jém tronoyucmi iga jém Cordero achiiba jém tsam mijpic castigo.

¹⁷Porque núcne jém jama iga chiiyajtáp castigo jém malopic pixiñtam. ¿I wiap íteñanjac Dios iwiñjom?

Accámayyajta sello jém Dios ipixiñtam

7 Jesic ocmi ánix cuatro siñyucmipic pixiñtam teñyaj icucuatro esquina de yíp naxyucmi. Ictēñ jém cuatro sawa iga odoy sujóyíñ yíp naxyucmi. Da ixujpa ni jém lamar ni jém cuyyaj. ²Jesic ánix tungac jém siñyucmipic pixiñ químpa jém añjamquímmi. Iniít jém sello jém vivopic Dios imiichi. Jesic pimi jiyajpa jém siñyucmipic pixiñ. Íjyáy jém tungac cuatro siñyucmipic pixiñtam jém iniítwiip jém pimi iga imalwadáypa jém nas y jém lamar. ³Nimpa:

—Odoy malwadaayi ni jém nas ni jém lamar ni jém cuyyaj

hasta que tanaccámáypa jém sello iwiñpacyucmi jém icuyoxayajpáppic Dios.

⁴Jesic ammatoñ iga accámayyajta jém sello ciento cuarenta y cuatro mil pixiñtam de ítumpiy jém tribu de jém Israelpic pixiñtam.

⁵Accámayyajta sello doce mil pixiñtam de jém tribu de Judá, y doce mil pixiñtam de jém tribu de Rubén, y doce mil pixiñtam de jém tribu de Gad, ⁶y doce mil pixiñtam de jém tribu de Aser, y doce mil pixiñtam de jém tribu de Neftalí, y doce mil pixiñtam de jém tribu de Manasés, ⁷y doce mil pixiñtam de jém tribu de Simeón, y doce mil pixiñtam de jém tribu de Leví, y doce mil pixiñtam de jém tribu de Isacar, ⁸y doce mil pixiñtam de jém tribu de Zabulón, y doce mil pixiñtam de jém tribu de José y doce mil pixiñtam de jém tribu de Benjamín.

Jáyan jém pixiñtam icámneyaj jém popyooí

⁹Ocmi ánix iga añtuumaneyaj tsam jáyan pixiñtam, da i wiap imay. Ítyaj ítumpiy clase de pixiñtam, jém tungac pixiñtam, jém jiyajpáppic tungac añmaíjimi y jém tungac naxyucmipic. Teñyaj jém trono iwiñjom y jém Cordero iwiñjom. Icámneyaj yagats yooí tsam popo. Imatspacne iciñjom tum suyat iay. ¹⁰Ítumpiy tsam pimi jiyajpa. Nimyajpa:

Taciacputnetámum jém tanJatuj Dios jém coñwiip jém tronoyucmi con jém Cordero.

¹¹Ítumpiy jém siñyucmipic pixiñtam icuteñxetneyaj jém trono. Ítyajjim

jém wídaytam y jém cuatro vivopíc cosa. Jesic ífumpiy jém ífyajwiip jem tocsneactiñyaj jém trono iwiñjom iga ijísyajpa Dios. ¹²Nímyajpa ífumpiy:

¡Amén! Tañcujíptámpa tanJatuñ Dios.

Tsam wibic anjagooyi.

Tannímaytámpa iga iyucuipdios.

Je iniit ífumpiy ijixi y ífumpiy ipimi.

Wiap iwat ífumpiy cosa.

Wi iga tañcujíppa Dios ífumpiy jém siglos. Amén.

¹³Jesic tum jém wídaytam acwác. Anímáy:

—¿Que japaap yípyaj pixiñtam jém icámneyajwiip jém yagatsyooti tsam popo? ¿Juí miññeyaj?

¹⁴Jesic ich annímáy:

—Mich iñjodoj.

Jesic jém wídaya anímáy:

—Yípyaj pixiñtam iñascayaj jém mijpic yaachaji. Icheeyaj jém iyooti con jém Cordero iñiipiñ hasta tsíy tsam popo. ¹⁵Jeeyucmi wiap iñúcyaj jém anjagooyi itrono iwiñjom. Wiap icuyoxayaj Dios tsuucim y siññi jém siñyucmipic masticjom. Y Dios, jém coññewiip jém tronoyucmi, iyoxpátpa jém ipixiñtam con ipimi porque iwaganait. ¹⁶Jesic dá más yuayajpa ni dam níctitsayajpa ni dam iñooba jém jama ni jém piji. ¹⁷Porque jém Cordero jém ítwiip cucmi jém trono iwatpa cuenta jém ipixiñtam. Ininicpa jém wibic niixcuy juí putpa jém ni jém tachiipáppic vida. Jesic Dios icujicháyáypa ífumpiy jém iixcañni.

Jacta jém íñajpic libro ígnúccuy

8 Jesic cuando jém Cordero ijac jém íñajpic libro ixello, jém

sietepic, dá tí tsigóypa siñyucmi como tum media hora. ²Ocmi ánix siete siñyucmipic pixiñtam jemum teñyaj jém Dios iwiñjom. Chiiyajtá siete trompeta. ³Ánixtim tum siñyucmipic pixiñ icunuc jém altar de oro, jemum teñ. Inisiiba tum xanu de oro juí nootap jém poma. Chiiía jáyan jém poma iga iñooba jém altaryucmi jém Dios iwiñjom iganam iwatyajpa oración jém Dios ipixiñtam. ⁴Jesic jém siñyucmipic pixiñ imatspacne jém xanu. Joogap jém poma. Químpa jém poma ijoco, waganúcyajpa jém Dios iwiñjom con jém oración jém iwatyajpaap jém Dios ipixiñtam. ⁵Jesic ipic jém xanu de oro, icucom jém juuy. Ítop juí yótpa jém jucti jém altaryucmi, ipatsquet hasta naxyucmi. Jesic agui tíñpa majjywiñ, tsam nácsóypa, tsam quénpa. Yíspa nas.

Sustap jém cuatro trompeta

⁶Jesic jém siete siñyucmipic pixiñtam jém iniityajwiip jém siete trompeta moj nawítsacyajtaji iga susyajpa.

⁷Jesic suspa jém wiñtipic siñyucmipic pixiñ, actiñ naxyucmi jém icxíuj y jucti motne con niipiñ. Jipsquet tum tercera parte jém nas y jém cuyyaj. Jipsquettim ífumpiy jém tsuspíc pimyaj.

⁸Ocmi suspa jém tungac siñyucmipic pixiñ jém wistenpic. Jesic ánix juuts tum mijpic cotsic agui jípspa, patsquetta lamar. Jesic setpa iga niipiñ tum tercera parte de jém lamar. ⁹Caayaj tum tercera parte de ífumpiy jém ífyajwiip lamar. Actogoyyajtá tum tercera parte de ífumpiy jém barcoyaj.

¹⁰Ocmi suspa jém tuḡgac siḡyucmipic p̄ixiñ jém tucutenp̄ic. Actiḡ siḡyucmi tum m̄ijpic matsa. Yótpa jém matsa juuts tum justi. Ictsiy tum tercera parte de jém ríoyaj y de jém niixcuy. ¹¹Jém matsa iñiyi jém tampic. Jesic tum tercera parte de jém ríoyaj y jém niixcuy setpa iga tam. Jesic caayaj jáyaḡ jém p̄ixiñtam porque tam jém ni.

¹²Ocmi suspa jém tuḡgac siḡyucmipic p̄ixiñ jém cuatropic. Pích tum tercera parte jém jama ichoça y jém poya ichoça y jém matsa ichoça. Da p̄imi tsoçajpa. Siḡñi da jesp̄iy tsoçpa jém jama. Tsuuciim da jesp̄iy tsoçpa jém poya ni jém matsa.

¹³Jesic ánix tum tajpi quécpa siḡyucmi. Ammatoḡ iga p̄imi j̄iypa. Nimpa:

—Agui uuguayim jém p̄ixiñtam jém ityajwiip yíp naxyucmi. Porque ts̄iy tucuten jém siḡyucmipic p̄ixiñtam iga ixuspa jém itrompeta.

9 Jesic jém tuḡgac siḡyucmipic p̄ixiñ jém cincopic ixus jém itrompeta. Ánix juuts tum matsa actiḡ siḡyucmi hasta yíp naxyucmi. Y jém actiḡnewiip naxyucmi chiíta jém llave iga iñáypa jém m̄ijpic jos tsam jojmi. ²Jesic iñáy jém m̄ijpic jos tsam jojmi. Putpa tum joco jém josjom juuts joogap tum m̄ijpic horno. Jém joco injoogapac jém jama ichoça, cupiçha icuwiñi yíp naxyucmi. ³Jesic jém jocoanjom putyaj jáyaḡ jém awu. Actiḡpa naxyucmi. Jém awu jex juuts cacwi tsam tibóypa. ⁴Nimayyajta jém awu iga odoy imalwadáyñ jém p̄imyaj ni jém ñipñi booyi ni jém

cuyyaj jém ityajwiip yíp naxyucmi. Solamente imalwadáyñ jém p̄ixiñtam jém ðapic ipictsoḡneyaj jém Dios imarca jém iwiñpacyucmi. ⁵Dios da ijícpa iga jém awu iccaayajiñ jém p̄ixiñtam no más iyaachwatpa cinco meses. Tsam p̄imi toypa juuts cuando tatippa jém cacwi. ⁶Jesic cuando núcpa jém malopic tiempo, tsam caayajtooba jém p̄ixiñtam, pero da wiap. Tsam imétsyajpa jutsap icaayaj, pero da ipátpa.

⁷Jém awu jex juuts tum cawaj wiṡsacne para jém guerra. Içobacyucmi iniit juuts tum corona de oro. Jém iwiñpac juuts p̄ixiñ.

⁸Tsam yagats iway juuts yomo. Jém it̄its juuts tum caḡ. ⁹Jém imijtayyucmi iccámne juuts tum t̄iḡcuy iga iyoxpátpa. Tsam p̄imi aḡj̄iypa jém ixaj juuts cuando nicyajpa jáyaḡ jém carreta jém ijícayajp̄appic jém cawaj cuando nicpa aḡajiyaj. ¹⁰Jém it̄uts jex juuts jém cacwi. Iniit it̄ibóycuy. Wiap imalwadáy jém p̄ixiñtam cinco meses. ¹¹Jém awu iniit tum injagooyi. Miñ jém m̄ijpic josjom. Jém aḡjagooyi iñiyi Abadón jém aḡmañi hebreo, pero jém aḡmañi griego iñiyi Apolión. Nimtooba jém actogóyoypaap.

¹²Nas jém wiñtipic yaachaji. Siip miñpa tuḡgac wisten.

¹³Jesic jém tuḡgac siḡyucmipic p̄ixiñ, jém seispic, ixus jém itrompeta. Jesic ammatoḡ tum j̄iyi jém altaryucmi de oro juí it̄ jém cuatro waj jém it̄wiip Dios iwiñjom. ¹⁴Jém j̄iyi iñimáy jém siḡyucmipic p̄ixiñ jém seispic jém iniitwiip jém itrompeta:

—Cutsigaayi jém cuatro siñyucmipic pixiñtam jém tsennetawiiip jém mijpic río aṇṇaca jém Eufates.

¹⁵Jesic cutsigayfa jém cuatro siñyucmipic pixiñtam iga iccaayajiñ jém tercera parte de jém pixiñtam jém ityajwiip yfp naxyucmi. Witsacnetawum dende wiñigam para jém hora y jém jama y jém meses y jém amfiy iga iccaayajpa jém pixiñtam. ¹⁶Jesic ammaton juten soldado ityaj, jém cawajyucmipic, doscientos millones.

¹⁷Jempigam ánix jém cawajyaj cuando ánix jém poñ. Y jém químnayawiiip jém cawajyucmi iccámyaj tum tñcuy ipechoyucmi iga iyoxpátpa. Algunos tsabats jém tñcuy, algunos tsus juuts jém siñpaqui, y algunos puuch. Jém cawajyaj icobac jex juuts cañ. Putpa jém ijipjom jucti y joco y azufre.

¹⁸Jém tucuten plagas iccaayaj jém tercer parte de jém pixiñtam jém jucti y joco y azufre jém putpáppic jém cawaj ijipjom. ¹⁹Yípyaj cawaj con icobac y con ítuts wiaṇ icca jém pixiñtam. Porque ítuts iqñiñi jex juuts tum tsañ icobac agui wasóypa. Imalwadayyajpa jém pixiñtam.

²⁰Pero jém pixiñtam jém dápic iccaayaj yípyaj plaga da icucacyaj jém ijixi. Seguido ijisyajpa jém watnas jém iwatnewiiip ciimi. Da ichacyajpa iga ijisyajpa jém Wocciwiñ ni jém watnas jém iwatneyawiiip de oro, de plata, de bronce, de tsa y de cuy, jém dápic ixixóypa, ni matóñóypa, ni wítpa. ²¹Da cucacyaj ijixi jém pixiñtam. Seguido accaóypa, iñawatwadáypa jém ífiwitam, pejóypa, númpa.

Jém inimiññewiiip jém xufo libro

10 Ocmi ánix tungac siñyucmipic pixiñ tsam iniif ipimi, quet siñyucmi. Añmonne con tum ucsi. Iniif tum júñichi icobacantcimi. Jém iámooyi tsam pimi tsoepa juuts jama. Jém ipuy juuts tum jucti agui yótpa.

²Imatspacne tum xufo libro áñayñe. Tum jém ipuy jém iqñimipic nepteñ jém lamar iwiñpacyucmi y jém aṇṇaymipic ipuy nepteñ naxyucmi.

³Pimi aṇwejpá juuts pámpa tum cañ. Cuando aṇwejpá, jesic tíñpañim jém siete jém majiywiñ, ammatóñay ijyi. ⁴Cuando yaj jiyi jém siete majiywiñ, anjaycámpa idic ti nimpá. Pero ammaton tum jiyi siñyucmi. Anímáy:

—Añyami ti nimyaj jém siete majiywiñ, odoy aṇmáti. Odoy jaycaami.

⁵Jesic jém siñyucmipic pixiñ jém ánixñewiiip nepteññe jém lamar iwiñpacyucmi y jém naxyucmi, icquím yucmi jém ici jém aṇwimipic. ⁶Nimpá:

—Jém vivopic Dios jém dápic nunca cuyajpa, iwat jém siñ y ítumpiy cosa jém ítwiip siñyucmi, iwattim jém nas y ítumpiy cosa jém ítwiip naxyucmi, iwattim jém lamar y ítumpiy cosa jém ityajwiip lamar. Yíptim Dios iwijodon iga da mammigóyáypa cuando mannímáypa iga siip cuyajpa jém tiempo. ⁷Cuando núcpa jém jama iga jém tungac siñyucmipic pixiñ, jém sietepic, moj ixus jém iñañpigam trompeta, jesic cupacum jém dápic tacjodóñane Dios. Iwatpa Dios juuts iñímáy jém profeta jém icuyoxayajpáppic.

⁸Jesic jém jyi jém
ammatoṅnewiip siṅyucmi eybic
ajíyáy. Anímáy:

—Nigi p̄ici jém xuṭu libro jém
áṅáyñewiip, jém imatspacnewiip
jém siṅyucm̄ipic p̄ixiñ, jém
nepteññewiip jém lamar
iwiñpacyucmi y jém naxyucmi.

⁹Jesic anic juṭ íf jém siṅyucm̄ipic
p̄ixiñ. Annímáy iga achiiñ jém xuṭu
libro. Jesic anímáy jém siṅyucm̄ipic
p̄ixiñ:

—Yiim íf. Miñi p̄ici. Cútqueti.
Tsam paac iñj̄ipjom juuts chiñu.
Pero jém impuujom agui taamap.

¹⁰Jesic ampic jém xuṭu libro
jém siṅyucm̄ipic p̄ixiñ icijom.
Aṅcútquet. Numa agui paac
anj̄ipjom juuts chiñu. Pero cuando
yaj aṅcút agui tam jém ampuujom.

¹¹Ocmi anímáyta:

—Tienes que eybic iniṅmadáypa
jáyay jém p̄ixiñtam tí miñpa.
Iniṅmadáypa jém tuṅgac p̄ixiñtam,
jém ítyajwiip tuṅgac naxyucmi, jém
j̄yyajpáppic tuṅgac aṅmaṭimi y ȳip
naxyucm̄ipic anjagooyiyaj.

Jém wisten testigoyaj

11 Jesic achiiṭa tum
quípsócyuy juuts tum
waycuy. Anímáyta:

—Tsucumi. Nigi quípsi jém
Dios imastic. Quípsi jém altar.
Mayi jutén jém p̄ixiñtam jém
ij̄isyajpáppic Dios jém masticjom.

²Pero odoy quípsi jém mastic
iañci. Porque Dios ichiiba iga
imiichap jém tuṅgac p̄ixiñtam.
Icunepnepquetyajpa jém w̄ibic
attedbet, jém Dios imiichi, cuarenta
y dos meses. ³Ich aṅcutsatpa wisten
testigo jém ichp̄ic anaṅmaṭciwiñ

iga iṅmadayyajpa jém p̄ixiñtam
ich anaṅquímayooyi. Iṅmatyajpa
tum mil doscientos sesenta jama.
Iccámpa tum yicyoofí juuts tum
p̄ixiñ p̄imi aṅyácne.

⁴Ȳip wisten testigo je jém
wisten olivos icuy, jém wisten jém
nooquejcyuy tuncuy, jém teññewiip
Dios iwiñjom. ⁵Siiga i imalwadáypa
ȳip wisten Dios iṅmaṭciwiñ jesic
putpa jucti ij̄ipjom, iñoquetpa jém
ienemigoyaj. Siiga i imalwadáypa,
jempigam iccaaba. ⁶Ȳip wisten
testigo wiap iṅnúc jém siṅ iga odoy
chijóyíñ jém tuj iganam iṅmatyajpa
jém Dios iṅmaṭi. Wiap̄tim icset jém
ni juuts niipiñ. Wiap̄tim iyaachwat
jém p̄ixiñtam con jém malop̄ic
caacuy juchixquej juuts je ixunpa.

⁷Jesic cuando yaj iṅmatyaj jém
Dios iṅmaṭi, tsucum jém m̄ijpic
animat jém Dios ienemigo jém
putnewiip jém m̄ijpic josjom. Tsam
áṅapa contra jém wisten jém Dios
itestigo, icoñw̄y. Accaata jém
wisten testigo. ⁸Tsacyajtap jém
wisten jém caaneyajwiip imijt̄ay
jém calle aṅnaça jém m̄ijpic attedbet
juṭ cunúnta cunusyucmi jém iQmi.
Tsam malo jém attedbet juuts jém
Sodoma y Egipto. ⁹Miñ íamyaj jém
accaanetaw̄iip tuṅgac p̄ixiñtam, de
tuṅgac naxyucmi, jém iṅmatpáppic
tuṅgac aṅmaṭimi, de jém tuṅgac
naciónyaj. Tucunajama y media
íamyajpa jém accaanetaw̄iip. Da
ij̄icpa iga cumtap. ¹⁰Ítump̄y
jém p̄ixiñtam jém ítyajwiip ȳip
naxyucmi agui maymayyaj iga
ca jém wisten aṅmaṭciwiñ. Agui
nachiiyajta xaja con íīwitam
porque agui p̄imi maymay. Tsam
ij̄óyixyajpa jém caaneyajwiip

porque jém wisten profeta tsam iyaachwat jém pixiñtam. ¹¹ Pero ocmi cuando nas jém tucunajama y media, Dios icpis. Siip vivojam eybicfim. Jesic itumpiy jém pixiñtam, jém iixñeyajwiip, tsam pimi cñyay. ¹² Jesic jém wisten testigo imatoñyay tum jiyi siñyucmi tsam pimi. Nímayta:

—Quiimi yim.

Jesic químyay siñyucmi, inmon jém ucsi iganam jém ienemigoyaj iixyay. ¹³ Jeefi rato miñ tum mijpic nasyixi. Icutiñ jáyañ jém tic icuwífi jém mijpic attebet. Inuntayaj jém décima parte. Accaayajta siete mil pixiñtam. Jesic jém tsññeyajwiip tsam pimi cñyay. Moj icujípyaj jém tanJatuj Dios jém itwiip siñyucmi.

¹⁴ Nasneum jém wistenpic yaachaji y da jáyñe miñpa jém tungac yaachaji jém trespic.

Jém inañpic trompeta

¹⁵ Jesic jém tungac siñyucmipic pixiñ, jém sietepic, ixus jém itrompeta. Ammatoñ mijpic jiyi siñyucmi. Nímyaj:

Siip tanJatuj Dios y jém tánOmi Cristo imiichi itumpiy jém naciónyay jém ityaywiip yíp naxyucmi.

Siip Dios injacpa yíp mundo para siempre.

¹⁶ Jesic jém wiđaytam, jém coñyajwiip jém veinticuatro iconcuyucmi jém Dios iwññom, tocsneactiñyay. Moj iñsyaj Dios.

¹⁷ Nímyajpa:

Mañcujíppa mánOmi Dios jém tsampic miwiap.

Mich miif dende wiñgam,

miifim siip, miif para siempre. Siip impictsoñe impimi, tsam miwiap.

Siip ininjacpa itumpiy cosa.

¹⁸ Tsam mijóyixpa jém pixiñtam jém ityajwiip yíp naxyucmi. Pero siip núcum jém tiempo iga inçiiñpa jém caaneyajwiip. Inchiiba castigo jém malopic pixiñtam.

Pero inwiyoypa jém impixiñtam jém micuyoxayajwiip, jém mich ininmatciñwiñ.

Inwiyoypa jém immiichipic jém mitoyyajpáppic, jém dápic juchañ y jém iniitwiip jém mijpic cargo.

Pero inñuntaactogoypa jém malopic pixiñtam jém ictogoytopáppic itumpiy jém michpic immiichi jém itwiip yíp naxyucmi.

¹⁹ Jesic ocmi añáy jém Dios imastic siñyucmi. Masticjom ánix jém baúl juuts jém watnetawiiip wiñgam cuando Dios iñycámáy jém ipixiñtam iga iciacputpa. Jesic tsam quénpa majiywiñ, agui tññpa. Ammatoñ mijpic añjji. Agui yñspa jém nas. Actiñ tum mijpic icxtuj.

Jém yomo y jém dragón

12 Jesic quejpa siñyucmi tum cosa dápic queman tánix. Tum yomo iccámne jém jama juuts itecxi. It jém poya ipuyciim. Iccámne icobacyucmi tum corona, iniif doce jém matsa jém coronayucmi. ² Manicomcane jém yomo. Agui añwejpa porque núcne jém tsixi ifoya. Agui yaachap iga naypa jém tsixi. ³ Ocmi quejpatim siñyucmi tungac cosa dápic

oypa tánix. Íf tum mijpic dragón agui tsabats. Siete icobac y diez iwan. Cada tumtum icobacyucmi iccámne tum corona. ⁴Con ífuts ijicmatspa jáyan jém matsa jém tercera parte jém ífwip siñyucmi. Iccutiñpa naxyucmi. Ocmi jém dragón nic teñi jém yomo iwiñjom jém icnaypáppic jém tsixi. Injócpa jém dragón iga iciijsa jém tsixi cuando nayum. ⁵Jesic jém yomo icnay tum jaychixi. Jém tsixi chiíta pimi iga injacpa ítumpiy jém naciónaj. Injacpa con tum tíñcuy vara. Pero ocmi accáyta jém tsixi, nanicta jém Dios iwiñjom jém mijpic coñcuyucmi. ⁶Jesic poy jém yomo, nic íti jém titsinaxyucmi juí da íñim. Dios iwítsagáy tum lugar juí nicpa íti, juí icwícpa tum mil doscientos sesenta día.

⁷Ocmi áñayajpa siñyucmi. Jém Miguel con jém ipixiñtam áñayajpa contra jém dragón con jém ipixiñtam. ⁸Pero da wia micoñwáy jém dragón. Dam í lugar para jeeyaj siñyucmi. ⁹Jesic quebacputta siñyucmi jém dragón, jém wiñicpic tsañ. Inñiyitim Wocciwiñ y Satanás. Imigóyáypa ítumpiy jém pixiñtam icuwiíti yíp naxyucmi. Quebacputta siñyucmi, acquetta naxyucmi jém Wocciwiñ con ítumpiy jém siñyucmicpic pixiñtam jém ítúñyyajpáppic.

¹⁰Jesic ammaton tum mijpic jiyi siñyucmi. Nímpa:

—Siip núcum jém tiempo iga taciacputpa Dios. Núcne jém ipimi. Siip injacpa yíp naxyucmi. Jém Cristo, jém Dios imiichi, ipictsoñe jém autoridad. Quejpa iga iniít ipimi porque quebacputta pimimi

jém Wocciwiñ jém tsampic icujiypa jém tantiwitam. Tsam iquejajwadáypa jém tantiwitam jém Dios iwiñjom tsuucim y siñni. ¹¹Pero jém Dios ipixiñtam wiap icoñwáy jém Wocciwiñ porque jém Cordero ítegáy inñipiñ iga iyoyáy ítáñca. Icoñwáy con jém wibic añquímayooyi jém inmatyáppic. Jeeyaj da cñyajpa iga togoypa ivida, pero ítyaj dispuesto iga accaayajtap. ¹²Maymáyataami jém miíftañwiip siñyucmi. Agui miuuguytim jém miíftañwiip naxyucmi y jém lamar porque quetneum naxyucmi jém Wocciwiñ juí miít. Tsam pimi jóyñe. Ijodon iga da jáyñe cuyajpa ipimi.

¹³Jesic cuando jém dragón iix iga patsquetnetawum naxyucmi, moj imalwadáy jém yomo jém icnayñewiip jém jaychixi. ¹⁴Pero jém yomo chiíta wisten jém mijtampic águila ixaj iga wiap iquec iga nicpa tungac lugar jém titsinaxyucmi juí da inñim, juumi de jém animat. Jenum wiídatap jém yomo tres año y medio. ¹⁵Jesic jém animat moj icput ni ijipjom iga iwatpa tum mijpic río iga icjídáypa jém yomo. ¹⁶Pero jém nas iyoxpát jém yomo. Áñáy jém nas, iucquet jém ni jém putnewiip jém animat ijipjom. ¹⁷Jesic jém dragón agui pimi ijóyixpa jém yomo. Nic iníña los de más jém yomo imanictam jém dapic ichacpa jém Dios inquímayooyi jém icupicpáppic Jesucristo.

Jém tungac wisten animat

13 Ich atēñ jém lamar aññaca cuando ánix tum tsam

mijpic animat put jém lamar. Iniiť siete icobac y diez iwaŋ. Cada tũmtũm jém iwaŋyucmi iniiť tũm corona. Cada tũmtũm icobacyucmi inimiň tũm malopic niyi iga icujiypa tanDios. ²Yíp animat, jém ánixñewiip, juuts tũm caŋ. Ipuy jex juuts jém oso. Ijip juuts jém león. Jém dragón ichi jém ipimi, iccám juuts tũm aŋjagooyi, ichi mijpic autoridad. ³Ánix tũm jém animat icobac pimi coowane. Iccaatooba jém icoowaji, pero ocmi pis jém icoowaji jém iccaapáppic idic. Jesic itũmpiy jém pixiňtam agui ipooňanjamyajpa, ocmi moj itũŋiyaj. ⁴Jesic jém pixiňtam ijisyajpa jém dragón juuts tũm dios porque ichiñe ipimi jém mijpic animat jém putnewiip jém lamar. Jesic ijisyajpatim jém mijpic animat. Niŋmyajpa:

—Da i tungac wiapaap juuts yíp animat. Da i wiap icoňwfy siiga áŋapa.

⁵Jesic chiifá lugar jém animat iga icujiypa tanDios iga tsam pimi imalmalnimáypa. Chiifá pimi iga iwatpa juuts je ixunpa para cuarenta y dos meses. ⁶Jesic íŋáy ijip, moj imalmalnimáy Dios y imalnimáy jém iniyi y jém wicom jut it Dios. Imalnimáytim jém ityajwiip sɨnyucmi. ⁷Chiifátim lugar iga áŋayajpa con jém Dios ipixiňtam jém imiichipic hasta que icoňwíypa. Chiifátim jém pimi iga injacpa itũmpiy clase de pixiňtam, jém jiyajpáppic jém tungac aŋmatimi y jém ityajwiip tungac naxyucmi. ⁸Ijisyajpa yíp animat itũmpiy jém pixiňtam jém ityajwiip icuwiti yíp naxyucmi,

jém ďapic jaycámnetá iniyi jém librojom jém tachiipáppic jém vida. Imiichi jém libro jém Cordero jém accaonetawiip dende moj íti yíp mundo.

⁹Siiga mifatsigiyfa, matonŋtaami. ¹⁰Siiga i ipajpa jém itíwi, jesic pajtapitim mex je. Siiga i accaoypa con espada, accaatapitim con espada mex je. Yiimpic quejpa iga iyaachíypa jém Dios ipixiňtam cuando yaachwattap iga da ichacpa, seguido icupicpa iga Dios wiap iyoxpát.

¹¹Ocmi ánix tungac tsam mijpic animat put nascim. Iniiť wisten iwaŋ jex juuts tũm maňborrego, pero jypa juuts jém dragón.

¹²Chiifátim itũmpiy jém ipimi jém iniiťwiip jém wiňtipic animat jém coowanewiip idic icobac y ocmi pis. Yíp ocmipic animat ipimíypa itũmpiy jém pixiňtam jém ityajwiip yíp naxyucmi iga ijisyajiň jém wiňtipic animat juuts tũm dios jém pisnewiip icoowaji. ¹³Wiaptim iwat jém mijtampic milagro. Icqetpa justic sɨnyucmi hasta yíp naxyucmi jém pixiňtam iwiňjom. ¹⁴Imigóyáypa jém pixiňtam jém ityajwiip yíp naxyucmi con jém mijpic milagro jém wiapaap iwat jém wiňtipic animat iwiňjom. Inimáy jém pixiňtam iga iwatyajiň tũm watnas juuts jém wiňtipic animat jém coowanewiip idic con jém espada, pero da ca. ¹⁵Jesic jém tungac animat, jém putnewiip nascim, iniiť ipimi iga ichiiba ivida jém watnas iga wiañi ijy. Ichi ipimi iga iccaayajpa itũmpiy jém pixiňtam jém ďapic ijisyajpa jém watnas.

¹⁶Jesic ipiimíy iga accámayfaiñ tum marca itumpiy jém pixiñtam iñwiciimi o iwiñpacyucmi. Itumpiy accámayyajtáp jém marca jém xufupic y jém mijpic, jém rico y jém pobre, jém esclavo y jém ñapic je esclavo. ¹⁷Siiga tum pixiñ ña iniñ jém marca, ña wiañ imáymáyóy ni juyjúyóy. Siiga iniñ jém marca o jém animat iñiyi o jém inumero wiañ imáymáyóy y wiañ ijuyjúyóy. ¹⁸Yíp ixunpa iga mijxiitámiñ. Siiga iñcutiyyíy, jistaami tí nimtooba jém animat inumero. Yíp nimtooba jém numero de jém pixiñtam. Jém inumero seiscientos sesenta y seis.

Wanyajpa jém 144,000

14 Ocmi aámquím, ánix jém Cordero iga teñ jém cotsicyucmi iñiyi Sión. Iwaganaityaj ciento cuarenta y cuatro mil jém ipixiñtam. Jaycámayta jém ipixiñtam iwiñpacyucmi jém Cordero iñiyi y jém iJatuj iñiyi. ²Jesic ammaton tum anjjiyi siñyucmi juuts jupa jáyañ ni, juuts tsam pimi tíñpa jém majiywiñ. Ammaton tum anjjiyi juuts ticstap tsam jáyañ arpa. ³Jesic jém pixiñtam iwanyajpa tum jomipic wañi juñ it jém trono jém Dios iwiñjom juñ it jém cuatro vivopic cosa y jém wiðaytam. Ña i wiañ ictsíy jém wañi, solamente jém ciento cuarenta y cuatro mil pixiñtam jém ciacputneyajtawii yíp naxyucmi. ⁴Yípyaj jém ñapic nunca yoomíy, ña nunca ijyypát yomo. Ifúnyayajpa juñ quej jém Cordero. Icupiñ Dios entre jém malopic pixiñtam. Iyojáy itañca.

Jeeyaj tsíy juuts jém wiñtipic tim. Tsíyyaj juuts Dios imiichi y juuts jém Cordero imiichi. ⁵Ña i migooyi ijipjom. Ña tñcafy jém tanJatuj Dios iwiñjom.

Jém tucuten siñyucmic pixiñtam jém inimiññewiip anmafi

⁶Jesic ánix tungac siñyucmic pixiñ quecpa siñyucmi. Inisiiba jém wibic anquimayooyi jém ñapic cuyajpa iga iñmadáya jém pixiñtam jém ityajwiip yíp naxyucmi. Anmadayyajtáp itumpiy clase de pixiñtam, jém tungac pixiñtam, jém jiyajpáppic tungac anmatimi y itumpiy jém ityajwiip jém tungacpic naxyucmi. ⁷Tsam pimi jiyapa jém siñyucmic pixiñ. Nimpa:

—Cijtaami Dios, cujiptaami. Siip núcneum jém hora iga ciipíñóyapa yíp naxyucmi. Jistaami Dios jém iwatnewiip jém siñ, jém nas, jém lamar y jém niixcuy.

⁸Jesic ocmi miñ tungac siñyucmic pixiñ. Nimpa:

—Actiñum, actiñum jém mijpic atebet jém Babilonia porque ichi jém malopic jixi itumpiy jém naciónyaj juuts iuquiwat con jém malopic vino iga icpejóyapa jém pixiñtam.

⁹Jesic ocmi miñ tungac siñyucmic pixiñ jém trespic. Tsam pimi jiyapa. Nimpa:

—Siiga i iñispa jém animat o jém iwatnas juuts tum dios y siiga i ipictsonpa jém animat imarca iwiñpacyucmi o iciiyucmi, ¹⁰jesic tienes que ipictsonpa tum mijpic castigo. Dios ichiiba castigo y ña iyaachanjampa ni uxañ.

Yaachwattap jém pìxiñ con jucti y azufre jém sñyucmìpic pìxiñfam iwiñjom y jém Cordero iwiñjom. ¹¹Jemum juť chiifap castigo tsam joogap itumpiy tiempo, ña nunca teñpa. Jém pìxiñfam ña nunca jejpa tsuucim ni sññi. Inñascaaba así itumpiy jém ijsyajpáppic jém animat y jém iwatnas y jém ipictsoñneyajwiip jém marca de jém animat inñyi. ¹²Yimur quejpa jém Dios ipixiñtam siiga ña ichacpa jém Dios inquímayooi y seguido icupicpa tánOmi Jesús.

¹³Jesic ammatoy tum jiyi sñyucmi. Anímáy:

—Jaycaami yíp añañi: Nimpa jém Dios iAnama iga dende siip tsam maymayaj jém pìxiñtam jém caaneyajwiip, jém icupicnewiip jém tánOmi Cristo. Siip ña yoxap, jejyajpa. Jém iconwiyooi iwaganait.

Piñtap jém cosecha yíp naxyucmi

¹⁴Ocmi aámquim y ánix tum ucsi tsam popo. Jém ucsyucmi coñ tum pìxiñ juuts jém Miññewiip Sñyucmi. Iniiť tum corona de oro icobacyucmi. Imatspacne tum tñcuy tsam tsupa iga ipiñpa jém cosecha. ¹⁵Jesic tungac sñyucmìpic pìxiñ put jém masticjom. Tsam pimi jiyapa. Inñmáy jém coñwiip jém ucsyucmi:

—Tññi con jém inñoz, piñi jém cosecha. Núcum jém hora iga impiñpa porque cñneum yíp naxyucmi.

¹⁶Jesic jém coñwiip jém ucsyucmi moj itññ jém cosecha yíp naxyucmi, ipiñ.

¹⁷Ocmi put tungac sñyucmìpic pìxiñ jém masticjom. Imatspacne

iciijom tum hoz tsam tsupa.

¹⁸Tungagam sñyucmìpic pìxiñ, jém jucti inñjagooyi, put de juť it jém altar. Jesic pimi iñyáypa jém tungac sñyucmìpic pìxiñ jém iniitwiip jém hoz aguipic tsupa.

Inñmáy:

—Tññi siip jém cosecha con jém hoz aguipic tsupa. Tññi jém uvas yíp naxyucmi porque siip cñneum.

¹⁹Jesic jém sñyucmìpic pìxiñ moj itññ jém uvas yíp naxyucmi. Itúc jém uvas, inñtumawatpa juť inñepnecotspa iga itobáypa jém uvas inñi. Yíp nimtooba iga Dios inñtumawatpa jém malopic pìxiñtam iga ichiiba castigo.

²⁰Jesic micstap jém uvas añsicmi de jém atebet. Tsam putpa niñpiñ juť micstap jém uvas. Tsam jojmi jém niñpiñ, núcpa hasta jém cawaj ifrenoyucmi. Núc tsam juumi jém niñpiñ trescientos kilómetro icuwoyo.

Jém siete malopic caacuy

15 Ocmi ánix sñyucmi tungac seña tsam mij, jém tsampic tampooñanjampa. Siete sñyucmìpic pìxiñtam inimiñyay siete jém inñañpigam caacuy. Cuando yaj miñi jém siete caacuy, jesic cuyajum jém Dios icastigo.

²Ocmi ánix juuts tum lamar de vidrio namotnetā con jucti. Teñyay jém Dios ipixiñtam jém lamar wiñpacyucmi. Jeeyaj iconwiyay jém mijpic animat y jém animat iwatnas. Icoñwiyitim jém inumero de jém inñyi. Inisiiba jém arpa jém ichiñewiip Dios. ³Iwanyajpa jém Moisés iwañi jém icuyoxanewiip Dios y jém Cordero iwañi. Nimpa:

MánQmi Dios, agui mijpic cosa mich inwat.

Agui tampooñanjampa.

Mich iniif itumpiy impimi.

Tsam miwipaap.

Mich tsam inwawatpa y da mimigóypa.

Mich más mijpic miRey ininjacpa itumpiy jém naciónyaj.

⁴ ¿I da micinpa, mánQmi Dios?

¿I da micujppa?

Porque solamente mimich jém dapic mitáncafy.

Itumpiy jém naciónyaj miñpa micosteeñayaj

porque jutquej tsam wiquejpa jém ininjuimayooyi.

Quejpa iga inñumciipinpa itumpiy jém pixiñtam.

⁵ Jesic ocmi cuando nasne yápyaj cosa, ánix siñyucmi iga ányáñe jém siñyucmicpic mastic hasta jém cuarto más jojmi jut if Dios ipimi.

⁶ Jém siñyucmicpic masticjom putyajpa jém siete siñyucmicpic pixiñtam jém inimiññewiip jém siete malopic caacuy. Wicuyajneyaj con jém popopic puctucu agui tsoepa. Iccámneyaj tum cinturón de oro jém ipechoyucmi.

⁷ Ocni tum de jém cuatro vivopic cosa ichi cada tum tum jém siñyucmicpic pixiñtam tum xanu de oro comne de jém mijpic castigo jém icutsatpaap Dios jém itwiip itumpiy tiempo. ⁸ Jesic jém siñyucmicpic masticjom comne de joco. Tsam if jém joco porque tsam if jém Dios ipimi. Da i wiap ifigiy jém masticjom hasta cuyajpa jém siete mijpic castigo jém inimiññewiip jém siete siñyucmicpic pixiñtam.

Jém siete xanu comne de castigo

16 Ocni ammatonj tum mijpic jiyi jém cuartojom jut if Dios ipimi. Nímayta jém siete siñyucmicpic pixiñtam:

—Siip nanici jém siete xanu jém Dios icastigo. Nigi cutegaayi naxyucmi.

² Jesic jém wiñtipic siñyucmicpic pixiñ icutegáy jém xanu naxyucmi. Itumpiy jém pixiñtam jém iniitwiiip jém mijpic animat imarca jém ijisyajpaap jém animat iwatnas imatsyaj jém malopic puuci tsam toypa, da witsypa.

³ Jesic jém tungac siñyucmicpic pixiñ jém wistenpic nic icutegáy jém xanu lamar. Setpa jém lamar juuts jém tsúts inñipiñ. Jesic itumpiy jém ityajwiip lamar caayajpa.

⁴ Jesic jém trespic siñyucmicpic pixiñ icutegáy jém xanu jém niicim y jém niixcuy. Itumpiy jém niijay set iga niipiñ. ⁵ Jesic ammatonj iga jiyajpa jém siñyucmicpic pixiñ jém icutegayñewiip jém xanu jém niicim. Nimpa:

—MánQmi Dios, miñumciipinóypa. Mich miif dende wiñigam y miitim hasta siip. Mich da mitáncafy. Agui inwiciipin jém malopic pixiñtam. Wi iga inchiiba jém mijpic castigo.

⁶ Porque jeeyaj iccaayaj jém impixiñtam jém ininmatciwiñ. Ítegáyay inñipiñ yip naxyucmi. Jeeyucmi wi iga inicset jém ni juuts niipiñ iga inigucpa jém malopic pixiñtam. Wi iga ipictsonyajpa jexpic castigo.

⁷ Ammatonjim tum jiyi jém altaryucmi. Nimpa:

—Numa, mánQmi Dios, mich iniif itumpiy impimi, inñumciipin juuts iwatneyaj.

⁸Jesic jém cuatropic sɨnyucmipic pɨxiñ icutegáy jém xanu jém jamyucmi y jém jama chiiŋa iga más pimi pijpa hasta iñooba jém pixinŋam con jém ipiji. ⁹Jesic tsam pimi jípsyaj jém pixinŋam con jém jama ipiji. Pero da icucacyaj ijixi iga da icujípyajpa Dios. Moj imalmalnámayyaj Dios jém icusatnewiip jém castigo.

¹⁰Jesic jém cincopic sɨnyucmipic pɨxiñ icutegáy jém xanu jém anjagooyi iconcuyucmi juŋ injacpa jém mijpic animat jém putnewiip lamar. Jesic cupiicha icuwíti jém naxyucmi. Tsam pimi yaachwattap jém pixinŋam hasta que iwaspa ífots con jém toya. ¹¹Tsam imalmalnámáy Dios jém ítwiip sɨnyucmi porque tsam yaachwattap con jém toya y jém puuci. Pero da icucacyaj ijixi iga imalwatyajpa.

¹²Jesic jém seispic sɨnyucmipic pɨxiñ icutegáy jém xanu jém mijpic río inñiyi Eufrates. Jesic tits jém ni iga wiap inñasyaj jém anjagooyiyaj jém miñpáppic anjamquímmi.

¹³Jesic ánix tucuten mal espíritu juuts nac. Tum jém nac put jém dragón ijipjom. Tum jém nac put jém mijpic animat ijipjom jém putnewiip lamar. Y tum jém nac put jém tungac mijpic animat ijipjom jém putnewiip nascim jém imígoyaypaap jém pixinŋam. ¹⁴Yíp mal espíritu jém Wocciwiñ imiichi wiapŋim wat milagro. Nicpa intuumawat ítumpiy jém anjagooyiyaj icuwíti yíp naxyucmi iga anayajpa con Dios jém jama jém icupiñnewiip jém tanJatuj Dios jém iniiŋtwiip ítumpiy ipimi.

¹⁵Nimpa Dios iga siip mannámáypa iga miíttámiñ al tanto.

Ich amiñpa juuts tum númpaap mancupiichciŋyapa. Tsam mimaymay siiga miíŋ listo y siiga iniccámne impuctucu. Jesic da inçusici. Da michaap iga miixpa jém pixinŋam.

¹⁶Jesic jém mal espíritu intuumawat ítumpiy jém anjagooyiyaj tum lugar inñiyi Armagedón jém anmaŋi hebreo.

¹⁷Jesic jém sietepic sɨnyucmipic pɨxiñ icutegáy jém xanu sauyucmi. Jesic jém sɨnyucmipic masticjom, juŋ íf Dios jém tronoyucmi, ammaton tum jiyi tsam pimi. Nimpa: —Cupacneum.

¹⁸Jesic agui quénpa majiywiñ. Agui tiñpa. Tsam nácsóyapa. Tsam pimi yispa jém nas. Tsam mijpic nasyixi. Da i queman oypa iix jexpic nasyixi tsam mij dende moj íti jém pixinŋam yíp naxyucmi. ¹⁹Jesic jac jém nas juŋ íf jém mijpic atebet. Tsíy tres pedazo. Jesic jém tungac atebetayaj icuwíti jém naxyucmi cujegayyaj íŋicyaj. Dios ijispa jém atebet Babilonia iga tsam imalwat jeeyucmi ichiiba jáyan castigo juuts tum vaso comne. ²⁰Togoyyaj ítumpiy jém isla jém ítwiip lamar. Togoyŋim mex jém çotsicyaj. ²¹También actiñŋim tum mijpic icxŋuj. Ictsíyapa jém pixinŋam. Tsam pimi mij jém icxŋuj hasta cuarenta kilo ichacxñi tumtum. Jesic jém pixinŋam tsam pimi imalmalnámáy Dios porque jém icxŋuj tsam pimi iyaachwatyaj. Tsam mijpic castigo chiijajta.

Chiiŋa castigo jém malopic yomo

17 Jesic tum de jém siete sɨnyucmipic pixinŋam jém inimiñnewiip jém siete xanu de oro miñ anímáy:

—Miñi. Manañquejáypa jém castigo jém ipictsonpáppic jém malopic yomo jém pejoypáppic jém coñwiip jém lamar. ²Yíp naxyucmipic anjagooyiyaj tsam pejoyyajpa con yíp malopic yomo. Tsam iuquiwatyaj yíp naxyucmipic pixiñtam con jém vino de jém malopic cusúniyooyi.

³Ocmi jém siñyucmipic pixiñ ananigáy jém ánanama tum titsinaxyucmi. Anquejáy juuts tum poñ. Ánix tum yomo iquímcane tum mijpic animat agui tsabats. Jém animat imijtayyucmi jaycámnetá itumpiy jém malopic anmatí jém icujyñewiip Dios. Jém animat iniit siete icobac y diez iwan. ⁴Jém yomo iccámne tum moradopic puctucu y tsabats. Agui wi cuyajne con oro, jém witampic tsa y jém perla. Imatspacne icijóm tum copa de oro comne de jém cosa jém tsampic ijóyixpa Dios con itumpiy jém malajixi iga tsam pejoyne yíp naxyucmi. ⁵Jém yomo jaycámnetá iñiyi iwiñpacyucmi jém dapic i wiap icutiíyí. Nimpa así: “Jém mijpic atebet Babilonia. Yíp yomo tsíy juuts appic de itumpiy jém malopic yomtám y itumpiy jém malopic jixi jém tsampic ijóyixpa Dios yíp naxyucmi.” ⁶Jesic ancutiíyí iga tsam uqui jém yomo. Iuc jém niipiñ juí accaata jém Dios ipixiñtam jém Jesucristo icuyucmi. Jém niipiñ iuquiwat. Cuando ánix jém yomo agui ampoñanjampa. ⁷Jesic jém siñyucmipic pixiñ anímáy:

—¿Tíiga agui impoñanjampa? Siip manañmadáypa jém dapic incutiíyípa y tí nimtooba jém

yomo iga iquímcane jém animat jém iniitwiip siete icobac y diez iwan. ⁸Jém animat jém siíppic iñix, íf idic wiñic, pero ocmi ca. Pero ocmi pis, putpa eybic jém mijpic josjom jém tsampic pimi jojmi. Nicpa jém lugar juí ipictsonpa castigo jém dapic nunca cuyajpa. Jesic itumpiy jém pixiñtam jém ityajwiip yíp naxyucmi jém dapic i jaycámayne iñiyi jém libro de la vida dende moj iwat Dios yíp mundo, jeeyaj tsam ipoñanjamyajpa cuando iixyajpa iga pisneum jém animat jém itwiip idic wiñigam y ocmi ca, pero eybic miñpa.

⁹Da itumpiy jém pixiñtam wiap icutiíyí, solamente jém jixiíywiip wiap icutiíyí. Jém siete icobac nimtooba jém siete cotsic juí coñ jém yomo. ¹⁰Jém icobac nimtoobatim siete mijpic anjagooyi. Nasneum cinco jém anjagooyi. Tum siibam injac y jém tunjac danam tsucumne. Y cuando miñpa jém injanpigam anjagooyi da jáyñe cuyajpa. ¹¹Jém mijpic animat jém itwiip wiñic y siip da i, cuando miñgacpa, tsíypa juuts jém ochopic anjagooyi. Tumtí ijixi y tumtí ipimi con jém tunjac sietepic. Ocmi nicpatim jém lugar juí ipictsonpa icastigo juí da nunca cuyajpa.

¹²Jesic jém diez iwan, jém iñixñewiip, nimtooba diez anjagooyi jém dapicnam ipictsonne icargo. Tsíypa juuts anjagooyi no más para tum rato iga injacyajpa yíp naxyucmi con jém mijpic animat. ¹³Yíp diez anjagooyi tumtí jixi iniityaj. Ichiijajpa itumpiy ipimi jém mijpic animat

iga iyoxpátpa. ¹⁴Jesic jeeyaj nícpa áñajiyaj contra jém Cordero. Pero jém Cordero iconwíypa. Jém tánOmi más wiapaap, je más mijpic añjagooyi que ítumpiy jém añjagooyiyaj. Jém ipixiñtam, jém iwaganaiñwiip, icupiy y inwejáy. Y jeeyaj da ichacyajpa iga icupícpa.

¹⁵Jesic jém siñyucmipic pìxiñ anímáyim:

—Jém lamar jém ñixñewiip juñ coñ jém malopíc yomo jém pejoypaap nimtooba ítumpiy jém pìxiñtam, jém ítýajwiip tungac naxyucmi, jém jiyajpáppic jém tungac añmatimi, jém tungac pìxiñtam. ¹⁶Jém malopíc animat con jém diez iwan, jém ñixñewiip, tsam ijóyixyajpa jém malopíc yomo jém pejoypáppic. Ichacyajpa icutum y cusici. Icódayajpa jém imayi. Ñooquetpa con jucti. ¹⁷Iwatyajpa jempic jém diez añjagooyi porque Dios ichi jém jixi iñnamañjom iga iwatyajiñ juuts je ixunpa iga tumti jixi iniítýaj iga ichiijaypa ipimi jém mijpic animat hasta que cupacpa ítumpiy juuts nimpa jém tanJatun Dios. ¹⁸Jém malopíc yomo jém ñixñewiip nimtooba jém mijpic atebet jém injacpáppic ítumpiy jém añjagooyiyaj icuwíti yíp naxyucmi.

Cuyajpa jém mijpic atebet Babilonia

18 Jesic ocmi ánix tungac siñyucmipic pìxiñ quet siñyucmi. Agui iniít ipimi. Iyicquejpa icuwíti yíp naxyucmi con jém ichoça. ²Tsam pimi jiyapa. Nimpa:

—Cuyajneum, cuyajneum jém mijpic atebet Babilonia. Tsíy

juuts tum lugar juñ nicpa ífi jém mal espíritu jém Wocciwiñ imiichi, juñ siiba jém espíritu dápic wí jém tamalwadaypáppic, juñ ítýaj jém malopíc jonyaj jém tsampic jóyixítap. ³Cuyajne jém atebet porque iuquiwat ítumpiy jém naciónyaj con jém vino de jém malopíc cusúniyooyi. Jém atebet Babilonia tsam icmalwat jém añjagooyiyaj icuwíti yíp naxyucmi. Tsam wí ít jém Babilonia, jeeyucmi jém máymáyoypaap tsam ricojaneyaj icuwíti de yíp naxyucmi porque jém pìxiñtam tsam icusúniyyajpa títam iixpa.

⁴Ocni ammaton tungac jiyi siñyucmi. Nimpa:

—Mimichítam mammiichítam, puttaami de jém atebet iga odoy immalwattámiñ juuts jém ítýajwiip jém atebet iga odoy impictsongtámiñ jém plagas, jém castigo jém Diospic icutsatpa.

⁵Porque jém ítánça añtuumaneum, núcneum hasta siñyucmi. Siip ijispa Dios iga tsam imalwatýaj, ichiiba castigo. ⁶Jempictim acseedayi jém yomo. Wisciy yoji juuts je iwat. Jém copa jém iwatnewiip jém yomo iga ñucpa, siip moti más jáyan iga dos veces más ñichiiba. ⁷Tsam pimi nacujípta iyaac. Tsam wí ít para jáyan tiempo. Jesic chiifaami jém yaachaji y jém anyaaqui tsam pimi. Tsam ijispa ijixianjom. Nimpa iga yim acoñ juuts tum reyna. Da nunca atsiypa añcutum juuts cunoya. Da nunca annascaaba jém anyaaqui. ⁸Jeeyucmi tumti jama miña ítumpiy jém plagas. Tsam jáyan caayajpa, tsam ít jém anyaaqui y jém mijpic yuu. Ocni

jípsquetpa con jucti. Porque agui wíap jém tánQmi Dios, iciipiŋpa jém mijpíc attebet, icyojpa jém ífánca.

⁹Tsam wejyajpa yíp naxyucmipíc anjagooyi, tsam anyácneyaj, porque agui pejóypa idíc con jém yomo, agui maymayyaj idíc. Pero siip tsam anyácneyaj cuando iix iga químpa jém ijoco juí jípsquetayajpa.

¹⁰Juumi tsíyyaj jém anjagooyiyaj porque tsam icíŋyajpa jém castigo. Nimyajpa:

—Agui uuguayím jém mijpíc attebet Babilonia, agui iniif idíc jém ipimi, pero siip tumtí rato núc jém mijpíc castigo.

¹¹Jém máymáyoyyapáppic tsam weyjajpaím. Pimi anyácneyaj iga cuyajneum jém attebet porque da i más ijúyáypa jém imáycuy. ¹²Íf jém carga de oro y plata y jém wítampíc tsa aguipíc tsoowíy y jém perla. Íf jém wibic puctucu jém lino y jém seda. Íftim moradopíc y tsabats. Íf jém wítampíc cuy jém cínápápic y jém cosa watneta de cuy aguipíc tsoowíy y jém marfil. Íftim cosa de bronce y tñcuy y mármol jém tsa aguipíc wi. ¹³Íftim carga de canela y jém especia cínpaap, jém poma, jém mirra y jém perfume. Íftim vino y aceite y jém wibic harina y trigo. Íftim bestia mular. Íftim borrego. Íftim cawaj. Íftim carreta. Íftim esclavos. Íftim jém pixiñtam ianama. ¹⁴Nímayajta jém ífayjwiip jém attebet:

—Ítumpiy jém wibic tim jém iŋcusúniypáppic cáyum de mich. Jém wítampíc cosa tsampíc tsoowíy siip mífogóyáy y da nunca impátpa.

¹⁵Jém máymáyoyyapap tsam ricojaneyaj cuando iwat negocio con jém attebet. Siip juumi tsíyyaj porque icíŋpa jém yaachaji jém siippic iñasca jém attebet. Tsam weyjajpa, tsam anyácneyaj.

¹⁶Nimyajpa:

—iAy, ay! Agui uuguayím jém mijpíc attebet. Tsam wícuyajne idíc con jém wibic puctucu morado y tsabatspíc. Agui wícuyajnetim con jém oro, jém wítampíc tsa y jém perla. ¹⁷Tumtí rato cuyaj ítumpiy jém mijpíc riqueza.

Ítumpiy jém icwiópáppic jém mijpíc barco con jém pasajeroyaj con jém yoxayajpáppic lamar, juumi teeñanjacyaj. ¹⁸Jesic iixyajpa iga químpa jém joco juí jípsquetpa jém attebet, tsam aŋweyjajpa. Nimyaj:

—¿Jup attebet jex juuts yíp mijpíc attebet?

¹⁹Como tsam pimi anyácneyaj iccámayñeyaj pótpót icobacyucmi. Tsam weyjajpa. Pimi aŋweyjajpa. Nimyaj:

—iAy, ay! Agui uuguayím yíp mijpíc attebet. Je icuyucmi ricojaneyaj ítumpiy jém iniifwiiip ibarco porque tsam tumiñíy jém attebet. Pero siip tumtí rato nunta miswatta.

²⁰Pero mimichám, miifñawiiip siŋyucmi, maymáyataami porque siip Dios ichiiba castigo yíp malopíc pixiñtam. Mimichám jém micutsatnewiiip Dios y jém inñmatpáppic jém Dios inñmatí, siip Dios icyojpa ífánca jém mimalwadayñewiiip.

²¹Jesic tum siŋyucmipíc pixiñ, tsampíc pimi, ipiŋ tum mijpíc

molino icha. Ipatscúm lamar.

Nimpa:

—Yicsabam icutiñ jém mijpic attebet Babilonia. Nunta togoypa. Da eybic inixítampa. ²²Yíp attebet da i nunca imatonpa jém música ni jém arpa, ni jém trompeta ni flauta. Itumpiy jém pixiñtam jém wiapaap iyoxa, dam más tampátpa yim, ni jém molino da más tammatonpa iga anjiypa. ²³Jemic da más tsocpa jém jucti. Da más matonpa jém bulla de jém anoomíyocuy. Jém máymáyoyapaap más wiayajpa idic que jém ityajwiip icuwiñi yíp naxyucmi. Imigóyáy itumpiy jém naciónayaj con jém inawadacuy.

²⁴Yíp attebet padayta jém profeta inñipiñ y jém dapic tancañ inñipiñ y itumpiy jém accaetanawiiip icuwiñi yíp naxyucmi.

19 Ocmi ammaton tum jiyi tsam mij. Pimi jiyajpa jáyan pixiñtam siñyucmi. Nimyajpa: ¡Aleluya! Jém tanJatun Dios wiap iciacput jém pixiñtam. Tsam wi jém tanDios, wiap iwat itumpiy cosa.

²Jém tanJatun Dios inñumciipin jém malopic yomo, jém pejoyapaap jém mijpic attebet, porque tsam icmalwatne jém ityajwiip yíp naxyucmi con jém malopic jixi.

Siip Dios ichécum jém ipixiñtam inñipiñ, jém accatawiiip jem.

³Jesic eybicim nijyaj: —¡Aleluya! Jém ijoco químpa

itumpiy tiempo.

⁴Jesic jém veinticuatro wídaytam con jém cuatro vivopic cosa tocsne actin naxyucmi iga ijisyajpa

Dios jém coñwiip jém anjagooyi

icoñcuyucmi. Nijyajpa:

—¡Itum wí! ¡Aleluya!

⁵Jesic put tum jiyi de juñ íf jém anjagooyi icoñcuy. Nimpa:

Cujiptaami jém tanJatun Dios, mimichfam, jém inycuyoxatampáppic Dios, jém inçintampáppic, mixufutampic y mijjampic.

Jém Cristo ipictsonpa jém ipixiñtam

⁶Jesic ammaton tum jiyi tsam mij juuts jiyajpa tsam jáyan pixiñtam, tum anjiyi juuts jupa jáyan ni, juuts pimi tiñpa jém majiywiñ. Nimpa:

¡Aleluya! Porque siip tsucumneum iga injacpa yíp naxyucmi jém tanOmi Dios jém iniiñwiip itumpiy ipimi.

⁷Siip tamaymáyatamiñ.

Wi iga tanaítamiñ jém maymáyaj tananamanjom y tançujíptampa Dios porque siip núcneum jém jama iga anoomíypa jém Cordero. Jém iyomo nawitsacnetawom. (Yíp nimtooba jém Dios ipixiñtam.)

⁸Jém yomo agui wicuyajne.

Chiita jém wibic puctucu, jém lino agui cuáyne, jém aguiipic tsocpa.

Jém wibic puctucu nimtooba iga witsagayñetawum jém Dios ipixiñtam itança. Ityajum listo iga nicpa iwaganaiñyaj Cristo.

⁹Jesic jém siñyucmipic pixiñ anímáy:

—Jaycaami así: “Agui maymay jém pixiñ jém inwejayñeyajwiip Dios iga nicpa siñajiyaj cuando anoomíypa jém Cordero.”

Anímáytim:

—Yíbam jém numapic aḡmaḡi, jém michiñnewiip Dios.

¹⁰Jesic acosteñ jém siḡyucmipic p̄ixiñ ipuyciim iga anj̄ispa. Pero anímáy:

—Odoy wati jempic. Ich aḡcuyoxap̄tim Dios juuts mimich y juuts jém iñfiwítam jém itúḡipáppic jém Jesús iḡquímayooyi, jém numapic. Odoy aj̄isi aich, j̄isi Dios.

Jém numapic aḡmaḡi, jém tachiñnewiip jém tánOmi Jesús, jeetim j̄ixi juuts jém ichiñnewiip Dios jém wiñ̄cpic iḡmaḡciwiñ.

Jém iquímcanewiip jém popcawaj

(Jn. 1:1; 1 Jn. 1:1)

¹¹Jesic ánix iga áḡáyñe jém siḡ. Ít tum popcawaj. Jém iquímcanewiip jém cawaj dá nunca miḡóypa y siempre iccupacpa juuts n̄impa. Numciip̄iḡóypa y áḡapa con justicia. ¹²Agui tsoḡpa jém iixcuy juuts yótpa jucti. Jém icobacyucmi accámayñeta wati jém corona. Jaycámnetā tum n̄iyi, pero dá i icutiḡiȳypa solamente je mismo. ¹³Accámayñeta tum yooḡi mujne con n̄iipiñ. Jém iñ̄iyi jém Dios Iḡmaḡi. ¹⁴Jém siḡyucmipic soldado itúḡiȳyajpa. Cada tumtum iquímcanē tum popcawaj. Accámayñeyajta jém wib̄ic puctuc̄u agui popo, cuáyñe. ¹⁵Jém anjagooyi jém iquímcanewiip jém popcawaj putpa iḡip̄jom tum espada agui tsupa. Con yip̄ espada iccoowap̄ jém naciónyaj icuw̄īi yip̄ naxyucmi. Iḡjacpaḡim con tum t̄iḡcuy vara. Iñepnepcots̄pa jém uvas con ipuy iga itóbáypa jém iñi. Yip̄ nimtooba

iga ichiiba castigo itump̄iy jém malop̄ic p̄ixiñtam. Porque Dios, jém iniit̄wiip itump̄iy ip̄imi, tsam p̄imi iḡyoyixáypa jém p̄ixiñtam it̄aḡca.

¹⁶Jaycámnetā jém iyooḡyucmi y jém iwiḡpuyyucmi: “Jém Rey de itump̄iy reyyaj, jém tánOmi Dios itump̄iy iomiyaj.”

¹⁷Ocmi ánix tum siḡyucmipic p̄ixiñ teñ jamjom. P̄imi j̄iypa. Iḡwejaȳypa itump̄iy jém jonyaj jém quecyajpáppic siḡyucmi. N̄impa: —Miñi miḡtuumaj̄itam yim.

Miñi miwiiquifam juḡ iwatpa Dios tum mij̄pic siḡ. ¹⁸Miñtaami iga iḡcudáyiñ jém reyyaj imayi y jém capitán imayi, y jém p̄imipic p̄ixiñ imayi. Iḡciispa jém icawaj imayi y jém cawaj iomi imayi. Iḡciispa itump̄iy jém p̄ixiñtam imayi jém esclavo jém ḡapic je esclavo jém mij̄pic y jém xutupic.

¹⁹Ocmi ánix jém mij̄pic animat con yip̄ naxyucmipic reyyaj con jém soldadoyaj, aḡtuumaneyaj iga áḡayajpa contra jém coñwiip jém popcawayucmi y contra jém soldadoyaj. ²⁰Matstā jém mij̄pic animat y jém malop̄ic profeta jém n̄imanḡaayanewiip iga Dios icutsatne. Yipyaj iwatyaj jém milagro jém mij̄pic animat iwiñjom iga imiḡóyayajpa jém p̄ixiñtam, jém ip̄ict̄sónḡayñeyajwiip jém animat imarca iwiñpacyucmi, jém iḡj̄isyajpaap jém animat iwatnas. Icuist̄ic siwiñ cotyajta jém juctjom jém laguna juḡ naps jucti jém tsamp̄ic p̄imi yótpa con azufre. ²¹Jesic itump̄iy jém p̄ixiñtam jém tsiyñeyajwiip, accaayajtap̄ con jém espada jém putnewiip jém mij̄pic anjagooyi iḡip̄jom, jém

iquímcanewiip jém cawaj. Jesic ítumpiy jém jonyaj cusum iciisyaj jém pixiñtam imayi.

**Cristo injacpa tum mil
amtiy yíp naxyucmi**

20 Jesic ánix iga quet tum siñyucmipic pixiñ. Inimiñ jém llave iga ínjáypa jém mijpic jos tsam jojmi. Imatspacne iciijom tum mijpic cadena. ²Jesic imats jém dragón, jém wíday tsañ, je jém Wocciwiñ y Satanás. Ichen para tum mil amtiy. ³Ipatscúm jém mijpic josjom tsam jojmi. Jemum ipaj. Iccámáy tum sello juť aḡnúcne iga odoy puđiñ. Jesic jém Wocciwiñ da wiap imigóyáy jém pixiñtam jém ityajwiip yíp naxyucmi hasta capspa jém tum mil amtiy. Cuando yaj naxi jém mil amtiy tienes que cutsigaytap jém Wocciwiñ tum rato.

⁴Ocmi ánix waťi jém anjagooyi iconcuy juť coñyay jém accámnetawiiip juuts juez iga ciipínóypa. Ánixáyťim jém pixiñtam íanama jém tiñcujagayñetawiiip iisci porque injmatyajpa iga Jesús wiap taciaput y iga injmatyajpa jém Dios injmaťi. Yíp pixiñtam da queman icosteeñayyaj jém mijpic animat ni jém animat iwatnas. Daťim ipictson jém animat imarca iwiñpacyucmi ni iciiyucmi. Iwaganaiťyajpa jém Cristo tum mil amtiy.

Iwagaanjacyajpaťim con Cristo. ⁵Yípyaj jém wiñťipic pisnewiip de juť it jém caaneyajwiip. Pero los de más jém caaneyajwiip da pisneyaj hasta que cuyajpa jém tum mil amtiy. ⁶Agui wı it jém wiñťipic

acpisnetawiiip. Tsíyyaj juuts Dios imiichi. Da caaba eybic. Tsíyyaj juuts panij iga icuyoxap Dios, iga icuyoxap Cristo. Iwagaanjacyajpa jém pixiñtam con Cristo tum mil amtiy.

⁷Jesic cuando cuyaj jém mil amtiy, cutsigayta jém Wocciwiñ juť pajnetá. ⁸Put iga imigóyáyıñ jém naciónyaj, jém pixiñtam jém ityajwiip icuwiťi yíp mundo. Nicpa imigóyáy jém lugar inñyi Gog y Magog. Injtuumawatyajpa jém pixiñtam iga áḡayajpa. Tsam pimi jáyay ityaj juuts jém pooy jém itwiip lamar aḡnaca. ⁹Miñyajpa icuwiťi yíp naxyucmi. Icuwoyxtneyaj juť anjtuumaneyaj jém Dios ipixiñtam jém attebet jém tsampic itoypa Dios. Jesic Dios icquet jucti naxyucmi. Yaj jípsquetiyaj itumpiy jém ienemigoyaj. ¹⁰Jesic jém Wocciwiñ, jém tsampic imigóyáy jém pixiñtam, patscumta jém juctjom jém laguna juť naps jucti, jemum tsam pimi yóťpa con azufre. Jemťim patscumnetá wiñťi jém mijpic animat y jém malopic profeta jém nímanťaayawiiip iga Dios icutsat. Jemigam yaachwattap tsuucim y siñni. Da nunca cuyajpa jém yaachaji.

**Ciipínóypa jém mijpic anjagooyi
jém popopic itrono**

¹¹Jesic ocmi ánix tum tsam mijpic trono agui popo. De jém coñnewiip iwiñjom poy jém nas y jém siñ, pero da ipátyaj juť nicyajpa. ¹²Jesic ánix jém caaneyajwiip teñyay Dios iwiñjom. Íťťim jém mijpic y jém xutupic. Áḡáyta jém libroyaj.

Ánjáyťatim jém tungac libro, jém libro de la vida. Cada tũmtũm jém caaneyajwiip ciipinyajtap juuts jaycámnetá librojom juuts iwatneyaj cuando vivo. ¹³Jém lamar chióy jém caaneyajwiip, iciijũcot jém ityajwiip jem. Jém muerte y jém Hades chióyťim jém caaneyajwiip. Iciijũcot jém ityajwiip jem. Ciipinyajta cada tũmtũm juuts iwat cuando vivonam. ¹⁴Y jém muerte y jém Hades acnicyajta jém juctjom jém laguna juť naps jucti. Yıpyaj tanimpa wisciy caaba, yıp laguna juť naps jucti. ¹⁵Jemťim cotyajtap itũmpiy jém pixińtam jém ďapic i ińiyi jém librojom juť accámneyajta jém ipictsonpáppic jém vida jém ďapic cuyajpa.

Jomipic siņ y jém nas

21 Jesic ánix tũm jomipic siņ y tũm jomipic nas porque jém wińcipic siņ y nas cuyajneum. Đatim i jém lamar. ²Ich aXiwan ánix jém wibic attebet, jém jomipic Jerusalén, quetpa siņyucmi Dios iwińjom. Wıtsacneum juuts tũm wońi jém iniťwiip trato iga jáyıyapa. Tsam wıćcuyajne iga ipictsonpa jém iwıđaya. ³Jesic ammatonj tũm mijpic jiyi siņyucmi. Nimpa:

—iMatonťaami! Siip miń iwaganaiťiyaj Dios jém pixińtam. Jeeyaj tsıy juuts Dios ipixińtam y Dios tsıy juuts jém pixińtam iDios. ⁴Dios icujicháypa jém ipixińtam iixcaņni. Đam más caaba jém pixińtam. Đa i jém aņyaaqui. Đam wejajpa. Đam i jém toya. Cuyajneum jém wińtipic cosa.

⁵Jesic jém cońwiip jém mijpic anjagooyi icońcuyucmi nimpa:

—iMatonťaami! Ich anacjomasetpa itũmpiy cosa.

Jesic anímáy:

—Jaycaami porque nũma yıp anaņmaťi, đa je migooyi. Tienes que cupacpa juuts mannımayne.

⁶Ocmi anímáyťim:

—Cupacneum. Ich jém awińtipic y jém iņaņpic, juuts jém letra jém alfa y omega. Siiga i nıctıtspa, ich anacnıcpa. Anchiiba jém ni jém ichiipáppic vida, jém quımpáppic jém wibic niixcuy. Đa ammánychiiba, ansaťypa. ⁷Siiga i icońwıyapa jém malopic jixi tienes que ipictsonpa itũmpiy jém wibic cosa juuts tũm tsıxi imiichap jém ijatuj imiichi. Ich atsıyapa juuts iDios y je tsıyapa juuts ich ammanic.

⁸Pero jém cuixiyajpic, jém ďapic icupıcyaj, jém jóyixoyajpaap, jém accaoyajpaap, jém pejoyajpaap, jém nawatyaj, jém iįsıyajpaap jém watnas y itũmpiy jém migoyajpaap, jeeyaj acnicyajtap jém laguna juť naps jucti, juť jípsyajpa con jém azufre. Jém acnicneyajtawıip jem tanimpa iga wisciy caayajpa.

Jém jomipic Jerusalén

⁹Jesic núc tũm jém siete siņyucmıpic pixińtam jém iniťwiip idic jém siete xanu de oro comne de jém siete iņaņpic caacuy. Anímáy:

—iMińi yim! Manañquejáypa jém wońi, jém ipicpaap jém Cordero iga aņcoomıyapa.

¹⁰Jesic ananıgáy ánaņama tũm mijpic cotsıcyucmi tsam pımi yucmi. Aņquejáy jém mijpic attebet jém wibic Jerusalén. Quetpa siņyucmi Dios iwińjom. ¹¹Jém

atbetet tsam wı̄ tsoepa con jém Dios ichoca. Agui tsoepa juuts tım tsa aguipic tsoowı̄y juuts jém wı̄bic tsa jém jaspe. Tanjuámnapa juuts tım cristal. ¹²Cutánne jém atbetet con tım mı̄jpic taañi tsam pı̄mi yucmi. Iniīf doce ipuerta. Cada tı̄mtım jém ipuerta íf tım sı̄nyucmı̄pic pı̄xiñ. Cada tı̄mtım jém puertayucmi jaycámayñetā iñı̄yi cada tı̄mtım de jém doce tribu de jém Israelpic pı̄xiñtam. ¹³Iniīf tres ipuerta anjamquı̄mmi. Iniīf tres ipuerta anjı̄xaumi. Iniīf tres ipuerta anjamtigı̄ymi. ¹⁴Jém atbetet iniīf doce ibase jūt pīmane jém taañi. Jaycámayñetā iñı̄yi cada tı̄mtım jém baseyucmi jém doce apóstolyaj jém icutsatnewı̄ip jém Cordero.

¹⁵Jém sı̄nyucmı̄pic pı̄xiñ jém anmatpáppic con aich inisība tım quı̄psóycuy de oro iga iquı̄psa jém atbetet y jém puertayaj y jém ífaañi. ¹⁶Jém atbetet cuadrada. Jesan̄tım iyagats jesan̄tım iwı̄ti. Jesic iquı̄psa jém atbetet con iquı̄psóycuy. Iyagats dos mil dosciento kilómetro, jesan̄tım iwı̄ti, jesan̄tım iyucmi. ¹⁷Ocmi iquı̄psa jém atbetet ífaañi. Iyucmi sesenta y cuatro metro. Jém sı̄nyucmı̄pic pı̄xiñ iquı̄psa con yı̄p naxyucmı̄pic quı̄psóycuy.

¹⁸Jém taañi watnetā de jém wı̄bic tsa jém jaspe. Jém atbetet watnetā naps oro. Agui tsoepa juuts vidrio. ¹⁹Jém ífaañi ibase wı̄accuyajnetā con jáyan jém wı̄tampic tsa. Tım jém base accámayñetā jém jaspe. Jém tun̄gac jém zafiro, jém tun̄gac jém ágata, jém tun̄gac jém

esmeralda, ²⁰jém tun̄gac jém ónice, jém tun̄gac jém cornalina, jém tun̄gac jém crisólito, jém tun̄gac jém berilo, jém tun̄gac jém topacio, jém tun̄gac jém crisoprasa, jém tun̄gac jém jacinto y jém tun̄gac jém amatista. ²¹Jém doce ipuerta watnetā de doce jém perla. Cada tı̄mtım jém puerta watnetā de tım perla. Jém atbetet icalle naps oro, juuts jém vidrio wı̄ap tanjuámnapa.

²²Da ánix ni tım mastic jém atbetet porque jém tánOmi Dios, jém iniītwı̄ip itı̄mpı̄y ipı̄mi, con jém Cordero, jeeyaj tsı̄yyaj juuts jém mastic. ²³Jém atbetet dátim ixunpa jém jama ni jém poya iga iyicquejpa porque Dios ichoca iyicquejpa y jém Cordero je jém ijucti. ²⁴Jém naciónyaj, jém iciacputnewı̄ip, sı̄iyajpa jém juctian̄tsocajom. Yı̄p naxyucmı̄pic anjagooyı̄yaj ininı̄cyajpa itı̄mpı̄y jém ipı̄mi jém atbetet jūt íf Dios. ²⁵Jém ipuerta da nunca an̄pajpa sı̄ñı̄, y jemı̄c da nunca pīichap. ²⁶Jém naciónyaj ininı̄cyajpa ipı̄mi jém mı̄jpic atbetet iga icujı̄pyajpa Dios. ²⁷Pero jém malopic cosa da tigı̄ypa jem. Dátim tigı̄ypa jém jóyixoypaap ni jém mı̄goypaap. Solamente tigı̄yyajpa jém pı̄xiñtam jém jaycámnetawı̄ip iñı̄yi jém Cordero ilibrojom jém ichiñnewı̄ip jém vida jém dápic cuyajpa.

22 Ocmi jém sı̄nyucmı̄pic pı̄xiñ anquejáy tım wı̄bic ni jém tachiipáppic vida jém dápic cuyajpa. Tsam cunajne jém ni juuts cristal. Putpa jém anjagooyi icoñcuyucı̄im jūt in̄jacpa Dios y jūt in̄jacpa jém Cordero. ²Cucmi

de jém calle de jém attebet y cada lado de jém ni íf jém cuyyaj jém tachiipáppic vida. Tímap doce veces tum amíy. Chióypa ífim cada meses. Jém cuy iay wí para icpisa jém naciónyaj. ³Jemic dá í jém cosa dápic wí, dam í ijyicámne jém castigo. Pero íf jém attebet jém más mijpic anjagooyi icoñcuy juí injacpa Dios y juí injacpa jém Cordero y jém imozoyaj icuyoxayajpa. ⁴Jeeyaj iixayajpa jém iOmi íamooyi. Cada tumtum jém imozo jaycámayñeta jém iOmi iñiyi iwiñpacyucmi. ⁵Jemic dam í piichi. Jém ítyajwiip jemic dá ixunpa jucti iga iyicquejpa. Dátim ixunpa jém jama ichoca porque jém tánOmi Dios iyicquejpa jém ipixiñtam y jeeyaj injacyajpa para itumpiy tiempo.

Da jáyñe miñgacpa Jesucristo

⁶Ocmi jém siñyucmipic pìxiñ anímáy:

—Yíp aḡmaṡi jém numapic. Dá je migooyi. Jém tánOmi Dios, jém ichiñewiip jìxi jém wiñcpiç inḡmaṡciwiñ, siip icutsat yíp naxyucmi tum jém siñyucmipic pìxiñ jém imiichipic iga inquejáyíñ jém icuyoxayajpaap tí miñpa dá jáyñe.

⁷—Dá jáyñe amiñpa. Jempam nimpá Cristo. Tsam maymay jém icupicpaap jém Dios inḡmaṡi jém jaycámayñetawiiip yíp librojom.

⁸Ich aXiwan. Ánix y ammaton yípyaj cosa. Jesic cuando yaj ánix y ammaton, acosteñ jém siñyucmipic pìxiñ ipuyciim jém aḡquejayñewiip ítumpiy yípyaj cosa iga anjìspa.

⁹Jesic nimpá jém siñyucmipic pìxiñ:

—Odoy wati jempic. Ich aḡcuyoxapṡim Dios juuts mimich y juuts jém iñṡiwitam jém inḡmatpáppic jém Dios inḡmaṡi y juuts jém icupicpáppic jém Dios inḡmaṡi jém jaycámayñetawiiip yíp librojom. Jìsi Dios.

¹⁰Anímáyṡim:

—Odoy anyami yíp aḡmaṡi jém nimnewiip tí miñpa, jém inḡjaycámnewiip yíp librojom, porque núctooba jém tiempo iga cupacpa juuts miñmayñeta. ¹¹Jém malopic pìxiñ seguido imalwadiñ y jém iniitwiip jém malopic jìxi seguido iwadiñ jém malopic cosa. Y jém wibic pìxiñ wí iga seguido iwíwadiñ. Y jém iniitwiip jém wibic jìxi íanamanjom wíṡim siiga seguido iwatpa juuts ixunpa Dios.

¹²Nimpá tánOmi Cristo:

—Dá jáyñe amiñpa. Anamiñpa jém coñwiyooyi. Anyojpa cada tumtum según juuts iwatne. ¹³Ich jém awiñṡipic y jém íḡaḡpic, juuts jém letras alfa y omega.

¹⁴Agui maymay jém icheenewiip ipuctucu. Jeeyucmi chiitap derecho iga icunúcpa jém wibic cuy jém ichiipáppic vida. Chiitapṡim derecho iga tigíypa jém puerta de jém jomipic Jerusalén. ¹⁵Pero tsíyyajpa aḡsicmi jém chimpa, jém nawatyaj, jém pejoypaap, jém accaoypaap, jém ijìspáppic jém watnas y jém tsampic ífoypa jém migooyi, jém migoypaap.

¹⁶—Ich aJesús. Mançutsadáy tum siñyucmipic pìxiñ, jém acuyoxapaap, iga inḡmadáyíñ yíp aḡmaṡi jém Dios ipixiñtam juí aḡtuumayajpa. Ich jém acobapic de jém rey David y

ich̄tīm jém iḡcmanic iman̄ic. Ich̄ jém awiŋm̄atsa jém tsocpáppic cuquejaciim.

¹⁷Jém Dios iAḡnama y jém Cordero iyomo, jém aḡcoom̄yoypaap, n̄impa: iMiñ̄i! Jém imatoḡyajpaap yíp aḡmaŋi n̄imyajpaŋim: iMiñ̄i!

Wi iga míñ̄iñ̄ jém n̄c̄titsnewiip. Jém iwian̄jamwiip, wi iga iuguiñ̄ jém ni jém tachii páppic vida. Da tamáychiiba Dios, tasaj̄ȳpa.

¹⁸Siip manac̄jod̄oḡap mimich̄tam, jém immatoḡpáppic yíp aḡmaŋi, jém jaycámnetaw̄iip yíp librojom. Siiga i iḡcod̄ȳpa yíp aḡmaŋi con tun̄gac aḡmaŋi, jesic Dios icmatspa

jém plagas juuts jaycámnet̄a yíp librojom. ¹⁹Siiga i iccáȳpa uxan̄ jém Dios iḡmaŋi juŋ jaycámnet̄a yíp librojom, jesic Dios iccáȳpa jém iñ̄yi jém libro de la vida. Iccáȳpaŋim jém derecho iga nicpa iŋi jém wib̄ic attebet. Daŋim ichiiba jém wib̄ic cosa juuts ijiycámayñ̄e Dios yíp librojom.

²⁰Jém iḡmatpaap n̄impa: —N̄uma, da jáyñ̄e amiñ̄pa.

Jesic ich̄ an̄impa: Ítum wi. iMiñ̄i, mán̄Omi Jesús!

²¹Jém tán̄Omi Jesucristo miwiwadayt̄amiñ̄ iñ̄t̄umpiȳtam. Amén. Jemum cuyaj.